

**EIGHTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

(FOR THIRD SITTING ON THURSDAY, THE 9th SEPTEMBER, 2021)

(Time 10:30 A.M to 1:00 P.M and 2:00 P.M to 4:00 P.M)

QUESTIONS

1. Questions entered in separate list to be asked and oral answers.

STATEMENT BY A MINISTER

2. **DR. R. LALTHANGLIANA**, Minister to make a statement on Covid-19.

LAYING OF PAPER

3. **PU ROBERT ROMAWIA ROYTE**, Minister to lay on the Table of the House correction of Answers to Starred Question. No. 219 of Eighth Session of Eighth Legislative Assembly.

PRESENTATION OF REPORT

4. **ER. H. LALZIRLIANA** to present to the House Sixth Report of Committee on Government Assurances (2020-2021).

5. **ELECTION TO FINANCIAL COMMITTEES** to elect members of –

- 1) Public Accounts Committee
- 2) Committee on Estimates
- 3) Committee on Public Undertakings
- 4) Committee on Local Fund Accounts

H. LALRINAWMA

Commissioner & Secretary.

SPEAKER : *“Mi hmanghria chuan thil tha lo chu a hmuhin a biru thin a; mi mawl erawh chuan a tawn mai thin a, a tuar phah thin”*

- Thufingte 22:3

Vawiinah hian Member zahawm tak tak, Pu Lalchamliana, Minister zahawm tak, Pu Nihar Kanti Chakma leh Pu B.D. Chakma te an lo tel leh thei lo a ni. Hei, kan Assembly hi kum 50 alo kal ve ta a, kan Chakma Member zahawm tak te tel lova Session kan thut vawi khatna a ni mai awm mang e.

Zawhna & Chhanna-ah kan kal ang a, Member zahawm tak Pu KT Rokhaw Starred Question No. 41 zawt turin ka sawm e.

PU K.T. ROKHAW : Pu Speaker, ka zawhna Starred Question No.41, Power & Electricity Minister chhan atan -

Siaha - Chakhei transmission line hlui em em tawh hi thlak tumna a awm em? tih ka zawt e.

SPEAKER : Chhang turin Power & Electricity Minister zahawm tak Pu R. Lalzirliana ilo sawm ang u.

PU R. LALZIRLIANA, MINISTER : Pu Speaker ka lawm e. Ka chhanna chu, “Awm e,” tih a ni.

SPEAKER : Zawhbelhna zawt turin member zahawm tak Pu Vanlalhlana a phar hmasa ber a, ka sawm e.

PU VANLALHLANA : Pu Speaker, nimin leh nimin piahah te ka phar thin a, zawhna ka chang theilo lutuk a, tun hi ka vawikhat zawhna a ni. (SPEAKER: I hnunga miten an phar hmasa thin si a, ka zah maw le. A lawmawm e, zawhna hun min pe a. Ka zawh belhna chu –

Line extension Bawngkawn Brigade Veng-ah sawn kan Minister hian min ngaihtuah sak thei ang em? Tin, Durtlang leh Leitan-ah te line extension hi kan mamawh em em mai a, chungah chuan khawngaih takin min siam sak thei ang em?

Tin, a dawt lehah chuan, P&E Department hi engtikah nge restructure a nih ang? Kum 2005 atangin hma lak a ni tawh a, mithiamte ko lutin recommendation te pawh an siam a, task group te siam a ni tawh a, Central atang pawhin restructuring hi recommend viau tawh ni tein kan hria a. Engnge harsatna, engtikah nge restructure hi peih a ni ang tih kha kan zawh belh a ni.

SPEAKER : Zawhbelhna zawt turin a phar hmasa ber leh a phar sang ber, Dr. ZR Thiamsanga ka sawm e.

DR. Z.R. THIAM SANGA : Pu Speaker, ka lawm e. Ka zawh belh duh chu, 132 kV line, Champhai, Khawzawl atanga min chawmtu hi kan kham khawp lo deuh thin a, chuvang chuan East Lungdar atanga 132 kV line Champhai chawmtu tur hmalak mek hi tunah hian engnge kan dinhmun tih kha ka zawt duh a ni e. Ka lawm e.

SPEAKER : A zawnha neitu khan a ti har lutuk a, a zahawm si a. Ngawi lawk rawh u, a zawnha neitu hi ka han sawm ang e aw. Pu KT Rokhaw ka sawm e.

PU K.T. ROKHAW : Pu Speaker, ka lawm e. Pu Speaker, kan Minister khan “Siaha - Chakhei transmission line siam that tum a ni” tia min chhanna kha ka lawm khawp mai a. Khi khi a rei tawh lutuk a, UT hun laia mi kha a nih avangin a chhe ngun khawp a, hetiang siam that tum a nih thu min lo hrih kha ka lawm viau a ni.

Tin, Pu Speaker, Siaha - Chakhei hi ka hriat danah chuan 32 kV line siam tum a ni a, Chakhei hi a sub-station atana ruahman a niin ka hria a, hei hi a dik em? Dik ni se, engtikah nge a hna hi tan a nih ang tih ka zawt duh a.

Tin, Pu Speaker, 132 kV line sub-station Lawngtlai-a dah tura hmalak mek a ni tih kan Minister zahawm takin Budget session-ah khan min hrih a, tunah hian he sub-station hi “zawh fel a ni tawh em, hman theih a ni tawh em” tih ka han zawt duh a. Tin, Power & Electricity hi Lawngtlai leh Siaha District mipuite tan chuan kan nunna nen a inzawm zualin ka hria a, Lawngtlai leh Siaha District Headquarter-a hospital te hi damlo tam takin an pan thin a, tunah phei chuan Pu Speaker, i hriat angin Burma buaina vangin, Burma lama kan unau te tam tak Siaha leh Lawngtlai-ah an awm a, tunah phei chuan kan Civil Hospital-te hi a lun em em mai a ni. Kan sorkarin CT Scan min pek kan lawm em em laiin a power, electricity power hian a zo lova, hman theih lohina awm a, a hman theih siloh avangin kan tan chuan *lungtum* nen a inang reng a ni. Chuvangin kan Minister zahawm tak hian he Lawngtlai 132 kV line sub-station hi a rang lama hman theih tura hma min laksak turin ka ngen a. Hemi Lawngtlai 132 kV line sub-station zawh velah hian Siaha 132 kV line sub-station hi hma min laksak nghal turin ka lo ngen bawka ni e. Ka lawm e.

SPEAKER : Awle, a theih ang anga chhang turin Minister zahawm tak Pu R. Lalzirliana ka sawm leh ang e.

PU R. LALZIRLIANA, MINISTER : Pu Speaker, member zahawm tak te zawnha kha zawt hmasa ber tu Pu Hlana khan hei Brigade line extension leh Durtlangah te pawh hian LT Line extension tih ngai a awm a, hei hi min tihsak thei ang em? a ti a. Hei a bial hi din ve ka duh deuhna a ni a Party hotute'n a rem an tih chuan kan inkhin mai hmel a, theih tawp chhuah kan rawn tum dawn a ni helai ah hian. (SPEAKER: Ava fair lo ve) Tin, restructure chungchang hi ni e tumna a rei tawh a, amaherawhchu kalphung han thlak deuh thut hi sawrkar leh Department tan pawh hian thil har tak a ni a, tun ah hian tum reng ala ni a, chumi atan chuan committee sang te pawh din a ni a, chungte chuan an rawn ngaihtuah ang a , an ngaihtuah chhuah chu sawrkar ah an rawn theh lut leh ang a, tichuanin kan la ti dawn chheih chheih chauh a nih chu, kha kha a ni deuh mai.

PU VANLALHLANA : (*audio failure*)... a harsatna laia kha 2005 ah tih tawh a ni a, committee te din a ni a, a rei viau tawh a. “Heti taka an delay-na chhan hi engnge ni a harsatna lai” tih ka zawt e.

PU R. LALZIRLIANA, MINISTER : Pu Speaker, a harsatna lai hi thil tam tak a awm a, chumi su kiang tur tak chuan a nia tunah committee sang an dinna chhan chu; chu lai chu a tawi zawnga ka chhan theih dan ni sela.

Dr. ZR Thiamsanga, MLA zahawm tak zawhna, 132 kV line Champhai, a bial lam a ni a, term hmasaa Pu Speaker, kan MLA pakhat Pu T. Sangkunga YMA hotupa ang deuh kha a ni a, sawi tur hi a hre si a, a bial lam hi a ngaihtuah em em mai a. A bial bakah Champhai District pumpui tana thil tha tur a ni a, hetia line khat chauha lo kal thin a hi, Bukpui, East Lungdar, Khawzawl, Champhai thlenga kal tura buatsaih a ni a. Hmanni khan kan Minister of State zahawm tak, Law Minister, Champhai bialtu pawh khan a han en a, an peih thawkhat tawh a. Transformer lian East Lungdar-a an dina pawh khi tunah chuan peih vek tawh a ni. Chuvangin hun reilo tea commission thei tawh mai turah kan beisei a ni.

Zawhna neitu Member zahawm tak Pu Rokhaw zawhna kha, nimin lamah khan a zawhna lo deuh kan ti tam a, min in nin ka hlau a, churang chuan a zawhna chhanna tawi tein, 'Awm e' ka han ti mai a ni a. Hei hi tunah hian tih tum mek niin, Asian Development Bank sum atanga tih tum a ni a, reilo teah kan tih theih mai tawh chu kan inbeisei a ni.

Tin, a zawhna pahnhna kha, helai ah hianin kan Finance Minister kan Chief Minister zahawmtak ni bawh hian Electric Department hi min rawn ngaihtuahpui nasa khawp mai a, Special Assistance (SPA) to State atana India sawrkarin vaibelchhia eng emaw zat min rawn *earmark* atangin Lawngtlai, "Construction of 2X12.5 mVA, 132, 32 kV sub-station with associated lines at Lawngtlai with an estimated cost of ₹16.79 crores" lai earmarked a ni a, hei hi kan Chief Minister zahawm tak hian min lo approve sak tawh a, hun reilo teah, kumin Financial Year chhung hi chuan kan tan hman chiah loh pawhin kan la thawk ngei turah kan ngai a. Chutiang chuan "construction of 2X12.5 mVA, 33,11 kV sub-station with 11 kV linking line at Marpara," pawh hi bialtu MLA zahawm takte hian an sawi fo thin a, vaibelchhe 8 lai kan dah a, "Strengthen and augmentation of 132 kV sub-station Luangmual by 3X25 mVA transformer with an associated cost of 14.03 crores", Luangmual sub-station han tih changtlun nan transformer pathum lai han dahna turte, "strengthening and augmentation of 132 kV sub-station Sihmui by 1X25 mVA transformer with an estimated cost of 4.68 crores" tithe, heng pali te hi kan department atang ringawtin tunah hian special assistance fund atanga thawh theih tura kan hmuh kan inbeisei a, kan lawm hle a ni tih kha ka sawi tel duh bawh a ni. Ka lawm e.

SPEAKER : Starred Question No. 42, a zawt turin Member zahawm tak Pu Lalchhuanthanga ka sawm e.

PU LALCHHUANTHANGA : Pu Speaker, ka zawhna PWD Minister chhan atan –

- a) PWD hnuaiah hna thalo enfiakhna Department hian a nei em?
- b) Nei ni se - i) Eng level officer in nge ho? ii) Officer chin engzat nge awm?

SPEAKER : Chhang turin Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER : Pu Speaker, Member zahawmtak Pu Lalchhuanthanga zawhna chhanna chu –

- i) Aw, nei e.
- ii) Executive Engineer chinin an ho. ii) Officer 5 an awm.

SPEAKER : Zawhbelhna zawt turin a zawhna neitu Pu Lalchhuanthanga ka sawm e.

PU LALCHHUANTHANGA : Pu Speaker, kan ram economy inngahna chu kawng hi a ni a, chuvang chu a ni maithei a, State kan nih atangin PWD hi Chief Minister ten an la thin a.

PWD-ah hian pawisa a tam khawp mai a, nikuma PWD-in pawisa an hman zat hi vaibelchhe 653 a ni a, Pu Speaker, an hmuhate te chu –

1. State Fund atangin vaibelchhe 85,
2. EAP atangin vaibelchhe 119,
3. NABARD atangin vaibelchhe 99,
4. Central Road Fund atangin vaibelchhe 44,
5. PMGSY atangin vaibelchhe 306,

A vaiin cheng vaibelchhe 653 a ni.

Nikum hmasa 2019-20 ah phei kha chuan a tam leh zual a, vaibelchhe 994 a ni. A tam khawp mai, amaherawhchu Pu Speaker, ti hian kan kawng hi a chhe em em reng a, kan kawng chhiat chhan te, a tlo loh chhan te, hna a hun taka zawh loh a nihna chhan te kan han zawh hian Department hotute chuan ti hian min chhang thin a, “contractor kan ngam lo, kan thusawiin awmzia a nei ve lo” tih a ni thin a, a paw em em a ni. Hetiang zat pawisa kan hmanga hetiang em em a kan kawng chhe si hi a paw em em a ni.

Chutia nih chuan heng kan kawng chhiat chhan te hi hna enkawltu quality control tute hian thu an neilo em ni? Tunge hetah hian a mawhphurtu, a contractor nge, a hna enkawl tu nge, a hna petu tih Minister ka zawt nawn leh e.

SPEAKER : Zawhbelhna zawt turin phar sang huai deuh pahnih an awm a, Pu C. Ngunlianchnunga leh Pu Lalrinsanga Ralte. A upa zawk Pu C. Ngunlianchnunga ka sawm hmasa ang e aw. Member zahawmtak Pu C. Ngunlianchnunga ka sawm e.

PU C. NGUNLIANCHUNGA : Pu Speaker, phar sang deuh min hmu a ka lawm hle mai, lawmthu ka sawi e.

Pu Speaker, ka zawhna pakhatna chu - Vanglaini nitin chanchinbu Dt.2.9.2011 headlines-ah khan Kaladan Multi-modal Transit Transport road hnuai compensation claim area hi Mizoram aiin a let 1.23-in a lian zawk a, 2,59,405 (sing hnih, sang nga, zakua, sawmli, bial panga) square kilometer angin ziah lan a ni a. He kawng atan hian meter 24 anga ziah lan a ni a, kawng chhak leh kawng thlang meter 12 ve ve chauh acquired niin ka lo hria a. He kawng pumpui compensation atana acquire theih zau zawng chu 2.3959 sq/kms a nih laiin engtin nge claim area hi 2,59,405 sq/kms anga chhut chhuah a nih theih? Tin, *claim area* chhut chhuah dan *mathematicals calculations* detail taka chhut chhuahna lehkha pawimawh *land pass documents* min pe thei ang em tih ka zawh belh a.

A pahnhnaah chuan, Lawngtlai- Diltlang-Parva ‘LDP road’ an tih hi BRTF kuta awm a ni a, kan bial lama *lifeline* kawng tak tak a ni a. A kawng hi a chhe em em mai a, Congress hun lain kawngchhia kan sawi thin a, tuh hi chu a chhia pawh a ni lo, a *rapthlak* a ni. Chutiang khawpa chhia chu a ni a, chu chu bialtu MLA ka nihna ang pawhin Chief Engineer Pushpak, Zemabawk hnenah hian siam tha turin ka ziak ve a, khawngaih takin kan Chief Minister zahawm tak hian min umzui sak se ka duh a. A kawng a chhiat mai piah lamah Ngengpui leilawn a thar dawh mek a ni a, a hlui thir leilawn (Bailey Bridge) hi a chhiat tawh avangin load phur motor pakhatmah kal kai tir an phal lova. He kawng hian a chhawrtute tan harsatna namen lo a thlen a, chuvang chuan khawngaih takin Bungtlang South-Vaseikai leh Ngengpui leilawn chhiate khi Chief Engineer Pushpak hnenah kan Chief Minister zahawm tak hian khawngaih takin min dilpui thei ang em, min sawi sak thei ang em tih ka zawt a.

A pathumnaah chuan, kan hriat theuh angin NH-54 Vairengte-Tuipang JAICA pawisa atangin Congress hunlai khan 4-lane road tura buatsaih a ni a, tunah hian hmalak mek a ni kan hre theuh mai. Chutih mek lai chuan Lawngtlai leh Hrangchalkawn inkar Congress sorkar laia ‘kawng a chhia’ tia Pu Ruatkima teho an ang an anglai pawh khan darkar 3 ½ vel kan kal thin a, tunah phei chuan Pu Speaker, darkar 5 vel kal a ngai a, a chhe mai a ni lo, a *rapthlak* a ni.

Chuvang chuan, kan hre theuh a, Covid-19-in min tibuai em em a, kan sorkar-in Lawngtlai leh Siaha damdawiin-ah te ICU ventilator nen min han dah sak ve nain a operate-tu tur doctor mithiam an awm leh si lova. Covid-19 vei ZMC panpui turte chu... (SPEAKER: I zawhnaah lut rawh le) Pu Speaker, kan harsatna lai tak kha khawngaihin ka han sawi tel duh a, Health Department subject a chhuak si lova.

Chutah chuan damlo inphurhna turte a mangan thlak em em mai a ni. Chuvang chuan Pu Speaker, khawngaih takin he kawng Hrangchalkawn-Lawngtlai (a bik takin kawng chhe rapthlak lutuk Congress sorkar lai chuan kawng a chhia a, MNF sorkarah chuan a rapthlak ka tih) hei hi company thawh a ni a, NHIDCL hnenah kan Chief Minister-in a khuar laite min hnawhkhah sak turin leh, a theih ang anga min siam that saka hma min laksak theih ang em tih ka zawt a ni e. Ka lawm e.

SPEAKER : Awle, chhim lamin an zawt a, hmar tawp lam atangin, a bialtu Pu Lalrinsanga Ralte, Member zahawm tak ka sawm e.

PU LALRINSANGA RALTE : Pu Speaker, ka lawm e. PWD changtu Minister zahawm tak chhana tan ka zawhna chu –

Ramri issue awm hnuah a bikin Serlui bial chhungah ramri humhalhna tur leh hmasawwna turin hnathawh PWD hian a nei em? A nei a nih chuan, khawi hmunahte nge hmalakna a neih tih min hrilh theih chuan ka lawm ngawt ang.

SPEAKER : Awle, a karki hlawm khawp mai a, a theih ang anga chhang turin Pu Zoramthanga, Chief Minister zahawm tak PWD changtu ka sawm e.

PU ZORAMTHANGA, CHIEF MINISTER : Pu Speaker, zawhna neitu Pu Lalchhuanthanga, Member zahawm takin a zawhna kha, “Executive Engineer 1 leh

Engineer dang 4 lain quality control leh development division kha an enkawl thin” tih kha kan chhanna a ni a. Zawhbellhnaah khan, “kawng chhia a tam si a, tunge mawh phur” tih kha, a then chu a hun lo lai ti mai ila, la tha tura ngaih a nih lain a chhia a, a then chu chhe ve hrim te pawh a awm a. “Tu mawh nge, engineer nge, contractor nge sorkar” tih kha, Ni e, a mawh inpek dan chi hrang hrang kha a awm teuh a.

An sawi pakhatah khan, “contractor kan ngam lo ang e an ti” a ti a, contractor-ho chuan sawi ve thung se engineer emaw an pekna tur kha chu lian tak a ni ang a. A then hna changlo chuan a sorkar lam efficient tawh loh vang tiin “hna an pe alawm” te pawh an ti ang a. “Khawvelah engatinge sualna a tam em em” ti ila, “zu vang a ni; drugs vang a ni; hmeichhiat-mipatna vang a ni; chumi vang a ni” tih dik vek si kha sawi tur a tam ang a, khatiang ang deuh kha PWD kawng chhiate pawh a ni ang a.

A tlangpui thuin kan hriat theuh angin kan ram hi monsoon area a ni a, chuvangin monsoon area ruah a han sur tak tak chuan kan pavement alcatra-te tuiin a han chiah a, a chhe chak em em mai a, mi ram aiin nasa takin a chhe chak a. Chuvangin tunah phei chuan ‘cement concrete a tih hi a ziaawm ber em’ tiin kawng tam tak chu tuna tang hian a theih ang chin chin chu cement concrete-in kan han ti ta reng a, a lo tlo pawh a tlo zawk a. Kan kawng chhiat chakna ber chu he bitumen kawng siamnaa kan hman leh monsoon a han intawng a, lei a lo min a, kawng chhawkin, chu chuan side drain a lo khuap a, tuiin a lo chim a, he kan bitumen hman hian fur tui a ngam lo em mai a, hei hi a chhiatna chhan tam tak a ni.

Tin, chu loah chuan contractor-ten an mawh ve chu, lung kan nei tha lova, he hi a chhan pakhat a ni han tih te pawh a awm a. Tam tak chu lung problem nen, fur chhe problem nen, sanction rawn kal problem nen contractor-te ,an chaklohna chi hrang hrang leh material an phurhna te fuh lo nen an hnate pawh an *surrender* tawp tawp a, ‘tih ngaihna a awm lo’ an ti a, theihtawp an chhuah pawhin kan ram weather-in a zir lohna leh kha lai advantage kha a chhiatna chhanah a lo kal ta thin a.

Tin, Engineer fel lo tak takte pawh an lo awm teuh ang a, fel tak tak pawh an tam a. “Kan engineer duh thlan thiau” pawh ti ila tun ang period-ah chuan englai pawha kawng tha hung tur chuan pawisa sanction tam tawh neih te a lo harsa a. Kan hriat theuh angin tunhma atangin keini state chang ni lo state dang pawhin kawng chhe tak tak an ngah em em a, an au hla pawh a ni reng a. Chuvangin kawngchhia mawhphurtu chu a tam khawp mai a, “kan weather, kan ram leilung min awlsam, engineer mawhphurhna, contractor mawhphurhna, raw material mawhphurhna te a ni teuh e” tih kha ka chhanna ni mai sela. ”Hei vang hi a ni” tih ringawt a awm lo thei a, “a inbelhbawm khawm a ni” tih kha ka chhanna ni sela.

Tin, Pu Ngunlianchung’a’n, “KMPTT compensation claim an chhut dana Land pass document min pe thei em” tih kha, engpawh ni se khalai kha chu kan lo en ang a, a harsa lo turah ka ngai a. Sawlai compensation saw Member zahawm tak, a bialtute leh hnaivai lam phei kha chu a hrechiang ber inni ang a, a buaithlak em em mai a, a lo pung leh hluai thin a. Entirnan, Mizoram hmun tam takah pawh a khua a tlawh ngei atanga compensation lak duh avanga kawng rem lo zawk her rem tuma company lam leh a titute’n duh loa, a khua leh khua pawh innawr a kawng laih hlei theih loh lai hi a tam khawp a. Chuvangin, Kaladan Multi-model Project pawh hi rin ai takin kan titlang tha ta a, amaherawhchu a fel lo lai a la awm a, chu chu theih tawpin kan lo enzui ang e.

Land pass document kha chu a theih turah ngai ila, rawn pek kan tum dawn nia. He kawng tlang hlan hi kan vaiin kan nghakhlel tlang a, sorkar lam pawhin theihtawp kan lo chhuah dawn nia. Tin, BRTF-in Diltlang kawng chhia kha... (PU C. NGUNLIANCHUNGA: Sq/kms 25,940 bial 5, Mizoram aia zau compensation claim anga chhut kha a dik reng em, tihsual palh nge tih lai kha min chhang thei ang em aw?) Heta document atang hian an rawn ti ang chu, tu claim nge, a dik em, dik lo em tih kha, heta han dap chawpah chuan a buaithlak lutuk a, number sing tel a ni tawh a. Chuvangin computer inchhawpa han her chhuah theih kha a ni tawh lova, kha lam kha chu kan rawn en dawn nia. Mizoram aia zau claim chu a dik lo ang a, chutiang zah a nih chuan a dik lo tih chu zawh ngai loa chiang sa a ni mai a. Amaherawhchu, tute nge claim, khatiing claim kan entertain em ti tih lam erawh chu hetah land pass document atang hian a chiang ang chu.

Tin, “Diltlang kawng BRTF-in an enkawl hi a chhe em mai a, leilawn te pawh siam that a ngai a, a harsa si a; chuvangin hei hi BRTF lamah min sawi pui ula” tih kha, kan theih tawpin keini pawhin kan lo sawi ang a. Kan hriat theuh angin fur lai chuan tu sorkar-ah pawh “kawng a chhia e” tih chu kan vai hriat tlan a ni. Amaherawhchu, a bik takin tunlai chu Covid avangin labour pawh, BRTF a ni emaw, contractor a ni emaw an hmu thei bik lova, harsatna chi tin reng kan kalkawng siam chungchang thua pawh Covid period-ah hi chuan a zual kai bik a ni tih chu mipui zawng zawngin kan hriat a ni. Engpawh ni se, kawngte chu a chhe lai a tam a, a tha lai pawh a tam viau a ni tih kha kan hriat ve pawh a tha baw a (PU C. NGUNLIANCHUNGA: *Lawngtlai-Diltlang-Parva road hi Bungtlang atanga thlang lam chu a tha lai a awm lo; chhe tak hi a ni mai.*)

Saw lai saw a chhia ani mahna, “a tha dang a tam e, Zoram pumpui kawng hi chhe em em a ni lo e” ka zuk tihna a ni a. Bungtlang kawng pawh siam meke a ni a, fur chhia te a ni a, factor tam tak kalkhawm lai a ni a, leilawn chhia te pawh a ni ang a. Kan theih tawpin BRTF lam pawh chu kan lo ti ang a, anni pawhin an sawi tur chu, “kan labourer” tih emaw, “Covid-in min ti buai nasa a ni” an ti ve thin kha a ni.

Engpawh nise, hei hi chu theih tawpin “BRTF lam pawhin tan lo la teh u, chhe deuh mah se kal theih hram hrama siam dan te lo dap teh u” kan lo ti dawn nia.

Tin, Pu Lalrinsanga Ralte Serlui Bialtu khan a bial lamah PWD-in a bik takin ramri bulah kawng siam te an nei em tih a rawn zawt a, hei hi kan theih ang tawk tawkin a bikin ramri bula kan Police-te awmna turte leh ramri venhimna atana kan mawmawh zualte kha chu, “lo thawk rawk rawk rawh u, sanction a awm hma pawhin lo thawk u la, sanction formalization chu nakinah kan umzui zel dawn nia” te kan ti a, a thawh pawh an lo thawk rawk rawk a, amaherawhchu, a thente chu thal deuh laia thawh ni mahse tam tak hi chu fur a nih avangin duh angin thawh a chak thei lova. Chuti chung chuan ka hriat theih maiah chuan khu kawng siam chin hi PWD concern a nih avangin Horticulture farm atanga Aitlang Police Duty post khu km 2.7 lai kan siam a, tunhnai ramri buai a zual hnu hian.

Tin, pahnhnaah chuan, Aitlang Police Duty post atanga Middle sikul khu km 3 lai a ni a, chung chu kan siam baw a. Tin, High School Tuikhuah road atanga Silgiri road Vairengte km 1 kan siam baw a ni. Tin, MIZOFED petrol pump IOC Veng Vairengte atanga Phaisen inkar km 16 lai siamthat a ni baw a. Tin, Buarchep,

Phainuam atanga Buarchep Police Duty post km 1½ siam a ni bawk a. Leisekawt atanga Bankankawn road Saiphum km 3½ kan siam bawk a ni. Tin, Bankankawn atanga Tuisen hnar Saipum km 4 kan siam bawk a, Bankankawn atanga Chawilung Saipum km 1 kan siam bawk a, Saichal atanga Tuisenlui Saipum hi km 1 kan siam bawk a. Buarchep Police Duty post atanga Saihapui-V meter 700 laih tlang tura hmalak mek a ni a, siam zawh a la ni lo deuh a.

Tin, Leitan atanga Sihpuizau Vairengte km 1 siam a ni tawh bawk a, Sabual mual atanga Aitlang Lui Vairengte km 1 siam a ni tawh bawk a. Sabual mual atanga Aitlang Lui Vairengte km 1 kha kha 12-na a ni a. 13-na, Buarchep tlang atanga Saiphai kawng pawh tur km 9 laih mek a ni a, la zawh loh deuh a ni. Tin, PWD-in khulai area atana tun hnaia a hmalakna, a bialtu pa-in a zawh takah chuan hei hi PWD-in theih anga kan lo thawh a ni a, “thawk tam pawh kan inti ve khawp e” tih kha... *(PU C. NGUNLIANCHUNGA: “NH-54, Hrangchalkawn – Lawngtlai NHIDCL te kha khawngaih takin thawk tha turin min hrilh sak thei ang em” tih kha khawngaih in House-ah min chhan theih kha ka va duh em.)*

Ni e, Hrangchalkawn-Lawngtlai kawng pawh BRTF-in theih tawpa lo ti zel turin contractor-te hnenah kan lo hrilh bawk dawn nia. Kha kha Pu Speaker, ka chhan theih a ni e.

SPEAKER : Starred Question No. 43, zawt turin Member zahawm tak Pu Lalrindika Ralte ka sawm e.

PU LALRINDIKA RALTE: Pu Speaker, ka lawm e. Environment, Forests & Climate Change Department changtu Minister zahawm tak chhan atan ka zawhna te chu-

- a) Kum 2020 hmalam Mizoram Pollution Control Board (MPCB) Chairman ruatna tehfung (qualification) engte nge?
- b) MPCB Chairman ruatna tehfung hi vawi engzat nge siam that tawh a nih?
- c) MPCB Chairman ruatna tehfung tuna hmanlai min hrilh thei em, tih a ni e. Ka lawm e.

SPEAKER : Chhang turin a changtu Minister zahawm tak Pu TJ Lalnunluanga i lo sawm ang u.

PU T.J. LALNUNTLUANGA, MINISTER: Pu Speaker, ka lawm e. Member zahawm tak Pu Lalrindika Ralte zawhna chhanna chu hetiang hi a ni-

- a) Kum 2020 hmalam MPCB Chairman tan Recruitment Rules a awm loh avangin a ruatna tehfung (qualification) a awm lo.
- b) MPCB Chairman ruatna tehfung hi tun hmain a awm lova, siamthat tur a awm lo.

MPCB Chairman ruatna tehfung hi tun hmalaman a la awm ngai lova, tun Ministry-ah kan buaipui nghal a. Tichuan, Ni 30/07/2021 khan official gazette-ah notification chhuah a ni a, chuta a chhuah dan chuan kan recruitment rules-te hetiang

hian rawn chhan a ni a. Pu Speaker, helai hi *English*-in an rawn chhang a, English-a an rawn ziah ang hian ka chhiar mai ang e.

- a) Rule 3(1)(a) - (i) Bachelor's degree from a recognized University; and (ii) A person having special knowledge or practical experience in respect of matters relating to environmental protection or a person having knowledge and experience in administering institutions dealing with the matters relating to prevention and control of water pollution and the maintaining or restoring of wholesomeness of water; or
- b) A person who has been a District Judge for at least 10 years with a degree in Environmental Science or Environmental Law from a recognized University; or
- c) An advocate who has been practicing in the District Court & High Court for at least 10 years with a degree in Environmental Science or Environmental Law from a recognized University; tih a ni e. Ka lawm e.

SPEAKER : Zawhbelhna zawt turin member zahawm tak Pu Lalduhoma ka sawm e.

PU LALDUHOMA : Pu Speaker, Pollution Control Board-a Chairman, Secretary leh member turte hi India sorkar hian a ngaipawimawh em em a. "The Water (Prevention & Control of Pollution) Act, 1974" hian a lo prescribed tawh a. Chutiang bawkin "The Air (Prevention & Control Pollution) Act, 1981" ah pawh hian hetiang mi turte qualification hi ziah a ni tawh bawk a.

Tin, *National Green Tribunal* hian state tin te hnenah "hetiang zul zui hian recruitment rules hi lo siam rawh u" tiin a hrilh vek tawh bawk a ni. Chutiang ni lova an duh dan tling lova *appoint* a lo awm thin avangin Supreme Court-ah pawh thubuai te a lo awm tawh a. Civil Appeal No.1359 of 2007-ah pawh hian Supreme Court hian, "Constitutional leh Statutory Requirement meet zo lo te hi chu rawn khing zel rawh u kan paih zel ang" an ti tawp mai a ni. Tichuan, Mizoram-ah hian 2004-ah khan mi Court-ah an kal a, an chak tawh a, an hneh tawh bawk a. Tuna Recruitment Rule an siamthar hian heng ka sawi *requirement*-te hi a meet lo ni a sawi a ni a, sawi huai huai a ni, Pu Speaker. Chuvangin Court-ah an kal ang a, min khingthla leh ang tih pawh kha thil hlauhawm tak a niin ka hria a.

Mizoram-ah hian mimal tinzawna recruitment siam te, mimal tinzawn a department bifurcate te a awm tawh a, hetiang thil thleng thin hi a pawm em em a ni. Chuvang chuan, environment lam kha a ngaih pawimawh ber a nih laiin tuna kan ngaihthlakah kha chuan, "court lam mithiam advocate kum chuti zat, District Judge kum chuti zat thawk tawh" tih lampang kha a hawi ta daih mai a. Tu emaw tinzawn nei ranin he Recruitment Rules hi siam niin a lang ta a, chuvang chuan sawiselna a ri ring ta em em a ni. Chuvangin, he Recruitment Rules hian ka han sawi takin a phut kha a tlin em, a nih loh chuan siam that leh mai tur a ni dawn lawm ni tih kha ka zawhna a ni e.

SPEAKER : Zawhbelhna zawt turin Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e. Ka zawhbelhna chu heng te hi a ni e –

Aizawl leh District khawpui dangah te pawh a ni ang a, Aizawl-ah phei chuan kan bul hnaia luite, a bik takin Chite Lui, Tuikual Lui te tihfai a ngai khawp mai a, enkawl an ngai khawp mai a. Chutah chuan eng tiangin nge department-in hma a lak?

Tin, a pahnihna ah chuan, tun hnaiah Tlawng Lui a kam lek lek avanga buai te khan kan awm a, a hnar lampang te a ngaihtuahawm khawp mai, kan lui dang te pawh an ni ang. Hengah hian kan lui liante a hnar lampanga lo fintute aniang chu, khang ang kha saptawng takin “recharge” kha engti angin nge department-in a neih tih a ni e.

SPEAKER : Zawhbelhna zawt turin a zawhna neitu, Member zahawm tak Pu Lalrindika Ralte ka sawm leh e.

PU LALRINDIKA RALTE : Pu Speaker, ka lawm e. Kan Minister zahawm tak chhanna khan “Recruitment Rules hi tunhmain la neih ngailoh” ti khan a sawi a, khalai kha chu sawthui vak lo ila, a neilo kha chu a mak ang reng khawp mai tih kha ka han sawi tel ve hram duh a.

Ka zawhbelhna chu, tuna Chairman hi Supreme Court leh Water Act and Air Act ina ‘qualify lo’ a tih zinga mi, Environment and Pollution Control Activities-a experience nei lo a ni em tih kha a ni e. Ka lawm e.

SPEAKER : Awle, a theih ang anga chhang turin a changtu Minister zahawm tak Pu T.J. Lalnuntluanga ka sawm e.

PU T.J. LALNUNTLUANGA, MINISTER : Pu Speaker, ka lawm e. Hmasawna tur hi kan vei tlang a, ram pawhin hma a sawn chho zel turah kan ngai a. Kan ram chu hmasawn mek lai kan ni a, State dang kum 40 kum 50 lo changkang tawh te an awm a. Tin, hetah India ram ang phei chuan kum sangbi tel lo changkang tawh te an ni a, keini hian mi hnungah theihtawp kan chhuah chho ve a. Tichuan, helai hmunah pawh Member zahawm tak tak ten kan vei thu leh hmasawna atan a an ngaihtuahna an lo sen thu te wawiinah kan hria a, kan hruaitute chungah pawh lawmthu ka sawi a.

Thil hi ngaihtuah kimloh te pawh awm thei a ni a, Amaherawhchu, tuna Pollution Control Board Chairman ruatnaah hian ngun taka Dan te ena tih a ni a. Member zahawm tak Pu Lalduhoma rawn zawhnaah khan tuna kan ruata hi he rules kan neih hmaa ruat fel a ni tawh a, chuta diltu awmchhun a ni a. Tin, helaiah hian ngaihtuahna pakhtah chuan, NGT Case hi a rawn piang chho ve zel a. Nichin a kan sawi tawh ang khan mipuite pawh kan thangharh chho ve zel a, case leh litigation chungchangah te hma kan sawn chho ve zel a. Chu kan hmasawn chhoh zelnaah chuan dan lama mithiamte an pawimawh tel a ni tih hriain Environmental Science lama thlurbing ngawt lo deuh Court lampang experience nei te dah a ni a, tichuan, Rules ah pawh khan kan telh ta kha a ni a. Chuvang chuan, kan rules hian helaia kan ruat hi a kalh lo niin kan hria a ni.

Tin, Member zahawm tak Dr. Vanlalhlana rawn zawhna kha kha khan a chhang tel nghal mai awm e. *Recharge* chungchang kha chu Pollution lam kaihhawih a ni chiah lo deuhin ka hria a, Environment & Forest Department chan kha a ni deuh a.

Recharge chungchangah kha chuan, thingphun te mission hrang hrang hnuaiah kan theihtawkin kan ti ve a, amaherawhchu, *awareness* lamah hian duh angin kan la chak tawk lo deuhin kan hria a, hma chu kan sawn cho viau tawh a, thingphun tangkaina te kan hre chho zel a. Tunah hian thingphun lamah hma kan la chho zel a, a tul anga Central Scheme hmangin hma kan la zui zel a ni tih kha ka chhanna ni mai se a tha awm e.

Tin, Pollution chungchangah Aizawl-ah te pawh hmun tawp deuhte a awm a, a veitu tam tak pawh an awm bawk a. Chite Lui chungchang rawn vei te pawh an awm a, tunah hian a committee lian pawh din a ni tawh a. Tunah hian Tuikual Lui chungchang pawh rawn sawi a awm leh tawh a, hei pawh hi ngaihtuahna kan hmang chho leh mek a ni.

Tin, heng lo pawh hi hmun hrang hranga kan luite tawp deuha kal thei mai tur angte pawh hi “humhalh an ngai chho tawh mang e” tih te pawh ngaihtuahnaah a tel a. ‘Save Chite’ kaihhraina zulzui ang khan tunah hian kalpui turin kan inbuatsaih chho mek a ni tih kha ka chhanna ni se la.

PU LALDUHOMA : Pu Speaker, ‘a diltu awmchhun’ tih kha advertisement chhuah a ni em? A nih chuan, a copy min pe thei em?

PU T.J. LALNUNTLUANGA, MINISTER : Pu Speaker, ‘Save Chite’ lui chungchangah chuan khatiang khan hmalakna a awm a, a tawp lai tihfai chungchangah te vei tute an awm a, chung chu department lam pawh hian kan enzui a. Staff hi duh angin kan indaih loh deuh avangin duh ang thal hi chuan hma kan la thei lo a ni tih kha kan chhanna ni sela. Kan luite thenfai chungchangah hian theihtawpin hma kan la ve zel a ni.

Tin, Member zahawm tak Pu Rindika zawhna pawh kha nichin khan kan chhang kim thawkhat tawh thoin ka hria a. Tuna rules kan hman dan leh Dan lampang kan mamawh dan te leh tuna Dan thar kan rawn duan te nen khan kha bak han sawi belh tur vak kha awmin a lang tawh lova.

Tichuan, Member zahawm tak Pu Lalduhoma rawn zawhbelhna kha, a tirah khan rules a awm loh avangin “advertisement tih tur” tih pawh a awm chuang lova. A criteria, ‘tute nge lak tur’ tih pawh kha kan la neih loh avangin sawrkar hian kan vei a, he Dan hi a ngai pawimawh a, mipuite pawhin an *aware* tan tawh a ni tih kan hriat avangin a rules kha kan siam a ni reng a. Tunah hi chuan Section 3-in lo en chuan, a qualification chungchang te, a lak dan chungchang te, public a notify a nih tur chungchang te kha kan rawn ziak vek tawh a.

PU LALDUHOMA : Engemaw *rules* chu a awm ang a, Chief Secretary Chiarman-na hnuaiah Search Committee pawh a awm a. Chungte pawh chu a kaltlang lo tih leh zel kha a ni a, dik chiah chuan he thil hi chu a felhlel khawp mai.

PU T.J. LALNUNTLUANGA, MINISTER : Pu Speaker, kha kha chu nakinah a hranin RTI hmang pawhin an la zawt thei turah ngai ila a tha awm e. “Pangngai tak, a Dan awmlo chung chung a uluk taka thlan chhuah a ni” tih kha ka han sawi nawn leh a ni e. Ka lawm e.

SPEAKER : Starred Question No. 44, zawt turin Member zahawm tak Er. H. Lalzirliana ka sawm e.

ER. H. LALZIRLIANA : Pu Speaker, ka lawm e. Ka zawhna hi Disaster Management & Rehabilitation Department changtu Minister min chhan atan a ni a. Amah hi a awmlo hlauh a, kan Chief Minister zahawm takin min chhansak dawn anih hmel a. Ka zawhna chu –

Mamit Bazar Veng lei tlahniam, *sinking area* kum sawm kal taa mi kha kuminah hian a che leh a. Hei hi siamthat hna thawk turin ruahmanna a awm em? A awm chuan engtikah nge hnathawh tan a nih ang tih kha ka zawhna a ni e.

SPEAKER : Minister zahawm tak Pu Lalchamliaana a awm lova, a chhang turin Pu Zoramthanga, Chief Minister zahawm tak ka sawm e.

PU ZORAMTHANGA, CHIEF MINISTER : Pu Speaker, Member zahawm tak Pu Zira zawhna chhanna chu, “Mamit Bazar Veng lei tlahniam, *restoration of sinking area* chungchangah hmalakna a awm rih lo” tih a ni e.

SPEAKER : Zawhbelhna zawt turin a zawhna neitu Er. H. Lalzirliana i lo sawm ang.

ER. H. LALZIRLIANA : Pu Speaker, zawhbelhna ka zawh hmain tlem han sawi ka duh deuh a. Kum sawm kal taah khan Pu Speaker, nang pawhin i hmuh kha, lei a tlahniam nasa hle a, a chat hmawk a nih kha. Kum sawm kal taah khan khulai bawr khu nasa deuhin a che a, chhungkaw tam takin an Inte an rauhsan a, hmun him lamah an kalsan a. A nghet tawh nia a lan hnu, kum tam tak hnuah kuminah khan nasa deuhin a rawn che leh a. Chuvangin en ngun deuh te pawh a ngaiin kan hria a. Hemi atan hian project pawh kan siam a, DM&R Minister hnenah pawh kan thehluhna pawh a rei tawh khawp mai a, ani pawh mumal takin ka sawipui tawh a. Ka duh lai tak chu, Geology Department lam hian mumal deuh zawkin Study Group te siamin endik ta sela.

Tin, hemi ruala ka sawi tel duh chu, Dampui khaw hnuaiah kawngpui a kal a, kham sang tak mai laih a ni a, an hal dur dur a, chu chuan Dampui khua pawh a tihim lo zo ta vek a, a khua mipuite pawh hian insawn an duh hial a. Amaherawhchu, thil awlai tak a ni lova. Kan Chief Minister zahawm tak hi khawtlang hruaitute leh keima ho pawhin kan hmu tawh nghe nghe a ni. Hemi zir chiang tur hian, nakinah “a lo him lo a ni” ti a inchhirna te emaw a awmlahna turin leh lo inven nan, a zirchiang turin Geology Department pawh kan ngen tawh a. Hei hi a bik takin Dampui khua *stability* leh Mamit Bazar Veng lei tlahniam hi min zirchian sak turin Geology Department min rawn tirh sak in hma min lak sak thei ang em? Hemi restore-na tur pawh hi rang zawkin min siam sak thei ang em tih ka zawhbelhna a ni e.

SPEAKER : Zawhbelhna zawt turin Dr. Vanlalhlana ka sawm e.

DR. VANLALTHLANA : Pu Speaker, ka lawm e. ‘Disaster Management’ tih chuan kei ka bialah hian Ramhlun Sports Complex te, Sihpui lam te a awm avangin a din lo theihloh thin a, chu chu ka han sawilang hmasa duh a.

Ka zawhna pakhatna chu, Ramhlun Vengthar chhimlam ep saw kham a ni tawp mai a, chhak lama tui luankawr saw khamah sawn a chhuk nghal tawp mai a, a bung thla nghal mai a, a mual muala tawlh theihna thil a nih avangin enfel a ngai khawp mai a. Ramhlun Vengthar, Ramhlun Sports Complex nena an inepna saw kham a ni mai a, saw saw min enfel sak theih chuan a lawmawm ngawt ang. Hmanni lawk pawh khan MLA Fund-in a piah kawr lungrem inkhai te kha chu kan lo khawih ve a, a thenlai chu a lo him tawh a, a lehlam chu.

A pahnhnaah chuan, Ramthar Veng chhim lam ep baw, Theihai Lui kan tih, Electric Veng nena an inrina thla saw; in thenkhat phei chu ruah a sur chuan a nghawr ri dup dup thei a, a hmunah te kan kal tawh a. Electric Vengthlang biakin pelh hretah sawn a hlauhawm lai te a awm leh tan tawh a. Tin, a thlang lampangah pawh lei hi a min deuh reng a, tun furah pawh hian silpaulin kan inpe hnem viau tawh a. A ral leh lampang ep saw chu lung an rem deuh fur a, ka bial lam hi rem ve dan te a awm ang em, min enpui thei ang em tih a ni a.

Tin, a tawp bernaah Ramhlun Sports Complex “Rehabilitation Centre” an tih saw ram inthehah sawn buai a awm neuh neuh a. Tin, a thenin duh duhnaah an rawn invalh a, in te an rawn sa a thil fel lo saw a tam a, an buai a. A tawpah MLA hnenah an rawn kal a, keini tan tihngaihna a vang thin khawp mai a. Tin, electric connection te saw an ti hlei thei lova LSC a fel loh avangin. Saw lai hmun saw min enfel pui thei ang em, department atangin tih kha ka rawn ngen leh a ni e. Ka lawm e.

SPEAKER : Zawhbelhna zawt turin Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. DM&R Department changtu Minister hi a awm lova, mahse kan Chief Minister zahawm takin a ai a awh avangin hei hi han sawi rik ka duh a.

Pakhatnaah chuan, Zotlang, Lunglei khawpui chhung a lei tlahniam hi ka zawt thin a, hei hi tunhnaiah DC hoin an rawn buaipui a, DPR te an rawn thehlut a. Hei hi engtin nge bawhzui a nih tak tih kha ka hre duh a.

Tin, he kawng hi he House zahawm takah hian ka sawi duh chu, chhim leh hmar inkalpawhna kawngpui pawimawh tak a ni a. National Highway-54, Pangzawl lam hi tunah widening project a kal avangin hei hi chhim leh hmarin kan rin ber kawngpui pawimawh a nih avangin a hlamchhiah theih hauh lova.

Tin, tunhnaiah hian Lunglei-in kan buaipui pakhat ‘Pu Mama hling’, Pu Zodintluanga’n *Real Time PCR* khawl a pek chungchangah hian court-ah te an kal a, Lunglei khawpui hi. Chutah chuan Tourist Lodge, Zotlang, tuna ka sawi kawng chungah chiah hian Tourist Lodge a awm a. Chungte chu *stop-gap arrangement*, khawl installation hmun tur atan en turin tih a ni a. Mahse expert team khan kawng kha an va en a, ‘*All weather road* a ni lo’ tiin leh ‘a feasible lo e’ tih te an sawi baw a. Chuvang chuan helai hmun hi ngaihtuah a ngai takzet a, a tlang chawpin a chim thla mai ang tih tur ang hian a awm a, a *sink* nasa em em mai a ni tih kha ka sawi duh a.

Chuvang chuan State Disaster Response Fund atang te hian tih hmanhmawh dan a awm em tih te, a nih loh pawhin project lian zawka DC leh sawlai PWD-a kan official

te nen a anrawn thehluh ho hi ngaihsak a ni em? Eng chen nge a kal tawh tih leh tun atan phei chuan ka sawi ang khan RT-PCR khawl install-na atan te pawh han en thuak thuak a ni a. Mahse chungte pawh chu, ‘a kawng a dik loh avangin tih hleihtheih a ni lo a ni’ tih te pawh a awm a. Eng pawh ni se, hei hi kan CM zahawm tak hi ka han zawt nghal a ni e. Ka lawm e.

SPEAKER : Awle, a chhang turin kan Chief Minister zahawm tak ka sawm e. Aw, ngawi lawk rawh aw; Zawhna & Chhanna hun a tawp a, kan chhan zawh tir law law dawn em? Tin, thil pakhat ka sawi duh lawk chu –

Pu Leader, khawngaihtakin, kan sawi tawh a, Minister-te awmlohin zawhbelhna hi lak ngaihloh a ni a. Amaherawhchu, Member ten ram tan thahnemngai takin material te in collect a, kan zah che u a. Kan CM hian, “ka chan a ni lo a, ka chhang lo mai ang e” a ti thei a ni. Amaherawhchu, a chhang ta zel a, tunah a theih chen chen chhang turin ka sawm e.

PU ZORAMTHANGA, CHIEF MINISTER : Pu Speaker, Member zahawm tak Pu Zira zawhna kha, Mamit Bazar Veng lei tlahniam chungchangah khan estimate amount hi cheng 250 lakhs vel Hon. Minister, DM&R department hnenah DO letter-in Ni 9.4.2021-ah a thehluh a. Hon. Minister, DM & R Deptt-in Directorate, DM & R-ah Ni 13.4.2021-ah lehkha hi a *endorse* a. Tun dinhmunah chuan fund a remchan rih loh avangin hmalakna a la awm lova, Ministry of Home Affairs, Govt. of India hian SDRMF Guideline a la tichhuak lova, Mitigation Fund hman phalna hmuh hunah phase-wise-in hmalak theih a ni ang. A Guideline hi an tichhuak har khawp mai a, kan nawr kan nawr a. Hemi tel lo hian kal a buaithlak ang reng si a, SDMF atanga hmalak a remchang lo a nih pawhin project atana sum mamawh a tam tham deuh avangin National Disaster Authority template zulzuiin DPR siama, NDMA kaltlanga fund dil theih a la ni bawkdawn a ni. Tin, ‘template’ han tih, ka sap tawng hman khat tak mai a ziak minrawn pekah hian a tel a. ‘template’ chu ‘templation plate’ tih ni awm tak a ni a. Thil a sample, thleng emaw thil dang emaw, pan te tea an han cheh kual, nakina zuk bawh hnana kha plate kha a sample tura an zuk tihna kha a ni a, anrawn ziak angin ka han chhiar mai si a. Eng pawh ni sela, NDMA-tena kaihhraina an siam zulzuiin DPR hi NDMA kaltlangin fund dil theih tur a ni a, chu lama chu “kan ngaihtuah ang a, kan lo en zui ang e” kan ti a ni.

Tin, “Geology lam hian an endik thei em” tih kha, hei hi a tul ber lai a ni a. Kan Geologist-te pawhin “Dampui khua zirchiang turin Geologist a ngai a ni” tih, kha nena kal kawp remchang tak mai a ni a, kha laia kha kan lo ngen ang a. A bialtupa pawhin a rilruah lo hria sela, a remchang hmasaah a Minister quarantine pawh a lo tawp tawh ang a, kha kha chu kan Geologist-te zirchian atan, a pahnihin vawi khatah a en kawp theih bawkdawn a, chutiang chuan tih ni se a tha khawpin ka ring a. Ni e, Dampui khua khu a hnuaiah kawng nasa tak kham sang pui puia laih a ni a, an hal bawkdawn si a, a chim rup ang tih a hlauhawm a. Khang kha zirchiang tur, a pahniha kawp remchang kha lo ngaihtuah ila, a bialtupate nen lo tangkawp ila a tha ang e.

Tin, Dr. Vanlalhlana han sawi, “Ramhlun Vengthara a chhim lam ep saw Geologist-ten an enfiah thei em” tih pawh kha a tul khawp mai a. Kan hre theuh ang a, a buaithlak khawp mai a. Tunlai hian limging te kan han nei a, ruahtui a tla lo vung vung vung a, a han tlak vek vek hian a tla nasa si a, chuvangin kan ram leilungin a tuar

zo lo em em mai a. Khangte kha engtia tih chi nge enchiang chungin, Hunthar Veng leimin te pawh an han ti a, uluk taka an han en chuan perek sei pui puia zuk kilhin, concrete block lian pui puiin an han kilh a, khatiang deuh khan kan ram lei tawlhthe pawh hi engtia tih tur chi nge tih beihpuia kan beih deuh a ngai a, kan lo hria ang e. Chutiang bawkin Ramthar Veng, Theihailui leh lungremsak ngaite pawh kha a rawn sawi a, a changtu minister hnenah pawh lo sawi chhonzawm zel ila, ani pawhin lo sawi chhonzawm sela.

Tin, “Ramhlun Sport Complex buai enfel theih ni se” tih kha, hei hi hman atangin a buai a, a buaithlak khawp mai a. Hei pheih hi chu Revenue Department ina tul anga enfel turin hma kan la tlang dawn nia.

Tin, Dr. Vanlaltanpuia, Mamber zahawm takina Lunglei Zotlang lung tla a sawi kha keini pawhin kan hria a, kan lo bawhzui zel ang a. Tin, Tourist Lodge kawng hlauhawm zia te pawh kha, a mual tawlhaw tawlh thei a ni a, ‘a hlauhawm khawp mai’ tih lai te pawh kha kan lo en zui zel ang e, a changtu minister pawh kan lo hrihl ang a. Amaherawhchu, CM-te chu buai kan nih avangin lo mangnghilh palh te pawh a awm thei a, a zawttu Member-ten a taka khawihthu a minister concern hnenah thlen ni se, ani pawh quarantine atangin a rawn chhuah theih thuai kan beisei a, ani pawh lo hrihl ni bawh sela a tha ang e.

SPEAKER : Zawhna & Chhanna-ah hian Member zahawm takte hriattir duh che u ka nei a.

Hei, ni thum chung lek a ni chungin tun tum hi zawhna a tam em em mai a. Starred Question hi 258 a lut a, Unstarred Question hi 227 a ni a, a vaiin 485 a lut a ni. Tin, tunah pawh hian Unstarred Question chhanna 37 lai chu House-ah dah hman loh a ni a. Kan hripui vang bawh hi a ni a, Legislation Branch-a kan staff-te an Covid a, an quarantine rup rup mai a, mahse, kal loh theih a ni si lova. Officer dangte kan han pawt chawp a, tikhan an thawk rim em em mai a. Nizan pawh tlaivar an tum a, Commissioner-in, “tlaivar mah ula kan zo hman chuang lo ang e” a ti a, chutiang chuan dar 12 an pel rak rak reng mai a. Chuvang chuan, vawi khat LoB kha a rawn tlai hlek a, zinga mi kha a ni bawh a.

Tin, Member zahawm tak te, ka han sawi leh duh bawka chu Deptt. atang hian dar 12:00 hma chu kan la tawh dawn lo a ni; chuti lo chuan in dawng tlai ziah mai a, Minister zahawm takte pawh kha han tirang tawh ula kan duh a ni.

Tin, kan media-te hi an tangkai a, kan zah em em mai a. Anni pawh kan pe thei lo a, tunah pawh ‘soft copy-in kan pe mai dawn em ni’ kan ti a. Chu chu Covid avang ni pah fawmin leh Question a tam em avang leh ni thum chung leka inchin fel burh theih anih loh avangin kan inthiamlo khawp mai tih kha ka han sawi leh duh a ni.

Aw le, Zawhna & Chhanna hun a lo zo leh ta a; Statement kan nei dawn a. Tunah hian kan Minister zahawm tak Dr. R. Lalthangliana’n kan Dan 60-na angin a rawn dil a, hripui Covid dona chungchangah. Tunah Statement siam turin ka sawm e.

DR. R. LALTHANGLIANA, MINISTER : Pu Speaker, kan rama rorelna sang ber he House zahawm taka ka thawhpui Member zahawm tak takte leh Zoram mipuite hmaah khawvel leh kan ram min tibuwaitu Covid 19 hripui leng kan hmachhawn dan leh

vawiina kan dinhmun tawn mek chungchanga Statement pe tura hun min pek avang hian ka lawm hle a ni.

Lawmthu sawinain bul han tan, Pu Speaker, ka duh a. Kan hriat angin hrilengin min kiansan lo mahse, India ram State dangte nena khaikhin chuan Pathian khawngaihna avangin kan dinhmun erawh hi a ziaawm hle thung a ni tih hi ka tarlang duh a. A chhan chu kan zavaia kan thawhhona a that vang a ni a, tu emawin a buaipui bik tura dah lova thukhat vuua kan tan hona rah a ni. Kan CM zahawm tak te, kan Minister, kan MLA zawng zawng te, ruling leh opposition thliar lova kan thawhhona duhawm tak kan hmuh hi a ropui takzet a ni. Sorkar Deptt. hrang hrangte an thawkrim em em a, hei bakah hian kan thawhpui, kan sangawi zawnpuite, Mizoram Kohhran Hruaitu Committee-te (MKHC), Joint NGO Co-Ordination Committee-te, Indian Medical Association-te, Non Govt. Hospital Association of Mizoram te, Association of Physician kan tihte, Aizawl City Local Council Association-te leh Joint Village Council Association te, Police te, VLTF te, LLTF te, volunteer frontline worker zawng zawngte, mipui kan zavaia kan thawhhona hi a ropui a, he kan thawhhona hi Pathian-in a chhanna kan hmu thin a ni.

Chutih rualin tanpuina chhiar sen loh kan dawng a. India ram pawn hmun hrang hrang, India ram chhungah pawh central sorkar leh ram chhung hmun hrang hrang atangte, mimal leh pawl angtein CM Relief Fund-ah sum a lo lut a. Heng bakah hian mimal leh pawl thahnemngai tam takin sum fai leh hmanrua ang zawngin hmun hrang hrangah chhinchhiah sen loh tanpuina pein an rawn luang chhuak hi a ropui hle a ni. Thingtlang lam atangin thei leh thlai thar ei tur, khawpui leh khaw dang harsa zualah te an pe ruih ruih a, Zonun zemawi tlawmngaihna leh inunauna, in lainat tawwna a rawn chawh tho leh hi thil chhinchhiahtlak a ni. Sawrkar hnathawk ten an hlawh atang an thawh bakah Association ang pawhin nasa takin hma an la a. Sawrkar hnathawkte pawh an hna pangngai kalsanin Covid dona atan duty an awl lova, ambulance driver te leh driver thenkhat te phei chu chhun zan zawmin covid damlo te phur kualin an nun an thap tak meuh meuh a ni.

MLA rualte pawhin lungrual takin kan hlawh kan thawh bakah MLA Fund thlengin kan luangchhuak a, AMC Mayor leh Councillor te nasa takain an luang chhuak bawh a, AMC te hian an hmanrua leh research neih te hmangin theih tawpin he hripui hi beihpuia, he 'Covid Care Centre' kan tih ang chi hmun zathum chuangah hian bawhlhawh paih hna an thawh a, a hautak hle a, tin heng bakah hian sum crore khat dawn an mahni pawisa an seng tih te kan hria a. Tin, bawhlhawh paih tih ralna tur atana khur laih ngai te alo awm a, khang zawnga an thawhna hi a ropui ka ti a ni. Hripui leng avangin *lockdown* puan alo ngai thin a, hei hian kan nunphung nasa takin a nghawng thin a, mi tam tak tan eizawwna a chhunzawm theih loh tih kan hria a, he hripui vanga kan buaina hi a namai lo hle a ni tih hi kan hre theuh awm e. Heng hunah hian Pu Speaker, mimal leh sumdawng pawlte chuan dawhthei takin sawrkar thu leh hla an ngaichang thin a, a lawmawm tak meuh meuh a ni.

Pu Speaker, Covid-19 hri puiin India ram a rawn thlen tan kha January Ni 27, 2020 (nikum) kha a ni a, khami hma khan Mizoram sawrkar chuan hma a la nghal tawh a, January Ni 20 atangin China atanga lo haw passenger te Lengpui Airport-ah screening tih tan a ni a. Tichuan February Ni 1, 2020-ah Lengpui Airport-a passenger lo

thleng zawng zawng *screening* tih tan a ni a, India rama Domestic Airport screening ti hmasa ber Mizoram hi kan niin kan inhria a ni. International border khar nghal a ni a, February Ni 4-ah Zokhawthar-ah screening tih tan a ni a, March thla tir lamah ramria entry point pawimawh zawng zawngah screening tih nghal a ni. Advisory chi hrang hrang rang taka chhuah nghal a ni thin a, theih tawp tak meuh chhuahin a kaw tawpa tangin kan tangho kha a ni. Covid-19 *first wave* ah Pathian-in kan tawngtaina a chhang a, kan dinhmun a ziaawm phah hle a ni. India sawrkar-in nikum December thla a ral hnuah chuan “Covid-19 positive in tam ve dawn a, 5000 in khum dawn a ni” tiin minrawn sawi thaih ti mai ila, warning minrawn pe a, keini pawh kan hlauthawng hle a nih kha. Amaherawh chu vanneihthlak takin December thla a ral meuh chuan positive kha an sawi ang kha kan lo ni ta lova, a lawmawm hle a. December thla chhung khan 369 kha kan ni a, rin ai khan kan tlem a ni. Tichuan ‘first wave’ kan tih mai hi kumin March thla thlenga positive kan neih zawng zawng hi mi 4,476 an ni a, hetih chhunga Covid-19 hri kai nunna hlu tak chan hi mi 11 an ni.

India ramah second wave a hluar a, hrikai ni khat thil thuah nuai li, nuai nga te a ni dawrh dawrh a, a sing tel tak meuh in nitin nunna an chan a, khatih lai khan keini lam kan thawm a dai ve kha a ni a. Mithiamte chhut danin *India mainland* aiin wave hrim hrim hi heng Mizoram leh North East-ah hian thla li vela tlaiin minrawn thleng thin a ni tih hi a dik te pawh hian a lang a ni. Second wave a rawn thleng a, virus insiam danglamin ‘Delta variant’ hlauhawm tak mai, a hmaa mi aia kai awl em em mai, hlauhawm baw si kha alo thleng ta a. Keini pawhin a tawp a tawpah chuan kan dawng lo thei ta lo a. Hei, kum April thla atang khan hrikai kan pung chak ta hle mai kha a ni a, April thla ringawtah khan positive 1,655 niin, May-ah 6,268, June-ah 8,093, July-ah 18,433, August-ah 21,074, wawiin hi September Ni 9 a ni a, tukin zing thlenga kan update-ah hian September thla ringawtah 7,972 kan nei ta a, hri kai zawng zawng tuna kan neih zat pawh hi kan pung ta hle a ni. Delta variant hlauhawm tak bakah hian variant dang kan tih mai ‘Alpha’ leh ‘Eta variant’ te pawh minrawn luh chilh ve tute an ni ta reng mai a. Heng virus-te hi ‘Wuhan variant’ kan tih mai, first wave a mi ai khan inkai chhawn a awlsamin a thawkna em em mai a, first wave thla 13 bawr vel kan experience chhunga nunna hlu tak chan 11 kan nei a, second wave alo thlen khan wawiin ni thleng (thla 5 emaw lek chhung) hian nunna hlu tak chan kan thahnem ta hle mai a, mi 210 chuang zetin nunna an chan a, wawiin, tukin zing update kan neihah hian mi 229-in nunna hlu tak kan chan tawh a ni.

Second wave atan hian theih tawp chhuahin kan inruahman a, April thla tira ZMC khum 210 zinga khum 56-te chu covid bika tana siam a ni phawt a, May thla hian ICU awmsa khum 13 bakah ICU extension khum 21, a vaiin ICU khum 34 kan nei ta a ni. Heng bakah hian hospital bed (khum) zawng zawng pawh Covid Ward-ah siamin khum 247 alo tling ta a, mamawhna a sang zel a, June leh July thla khan Covid ward thar pahnih, khum 60 awmna hawnbelh alo ni ta a, tunah hian a vaiin ZMC-ah khum 307 siam alo ni ta a. First wave-a khum 150 bawr vel pawh kan tlin loh laiin a let dawrhin kan sang ta a ni.

Sawi tawh angin phai lam India ram laili kan tih mai, *India mainland* ho an reh duk hnuah mi thiam hoin kan *peak* hun tur anrawn sawi ang deuhin kan peak ve ta ni hian a lang a, mahse Pathian khawngaihna zarah leh kan zavaia tanrualna zarah kan reh

ve duak theih beisei ta ila, theihtawp chhuah erawh chu vawiin niah hian a tul takzet a ni tih ka sawi duh a ni.

Covid-19 hripui dona kawngah hian induhkhawp a har em em mai a, Pu Speaker, theih tawp kan chhuah tak meuh meuh chung pawh hian keini ngei pawh hian ‘kimlo’ tih hi kan ngah em em a ni. Chutih rual erawh chuan Zoram mipui leh sawrkar tang hovin hripui kan do dan hi a tha thawkhat hle te pawh hian ka hria a, huai takin hei hi a sawi ngam te pawh hian kan hria a ni. Kan tum ber chu Pu Speaker, hri kai te rang taka hmuhchhuah zung zunga, lak hran a, kai ve thei dinhmun derthawnga awm te vil zuia, hri kaite pawh a hun taka enkawl na pek hi a ni. Nunna a tam thei ang bera chhanhim hi kan tum a ni. Thu lawmawm ve deuh kan sawi duh chu Pu Speaker, ‘case fatality rate’ an ti mai a, hri kai zingah nunna chan zat a tlem thei ang ber neih hi hnathawk tha leh tha lo tehfung pawimawh tak mai a nih laiin, hei, kan data kan han update a, India ram pumpuiah Pathian khawngaihna zarah kan thawk tha hle ve mai a Pu Speaker, India rama *case fatality rate* a pumpuia chawh rualin 1.3% a nih laiin 0.34 % kan lo ni ta a ni. Thi tlemna lamah India ram state-te zingah a hniam ber kan ni hi a lawmawm tak zet a, Pathian min venhimna leh hlih khuhna a ni.

Kan sawi tak ang khan, hri kaite hmuh chhuah vata, a hun taka enkawl na pek a tul avangin sample test pawh uar takin kan kalpui lo thei lova. Data thar berah chuan mihring awmzat atanga sample test tamna lamah hian Pu Speaker, North East State zingah kan ti tha ber a ni, tunah hian ‘pakhatna kan ni’ tih hi ka puang duh a ni. He mi chungchangah hian a thawktute inpekna leh thawhrimnate pawh hi a fakawm hle a ni tih hi ka tarlang duh a ni.

Sample test chungchangah hian Indian Council of Medical Research ICMR chuan RT-PCR/TrueNAT leh CBNAAT te hi thawh dan thuhmun a nih vangin huang khatah a dah a, sample test zawng zat percent a bituk tih pawh kan hria a. Amaherawhchu State dangte hian min lo tluk lo ve hle mai tih IDSP data thar berah hian kan hmu a, hei hi kan chhinchhiah pawh ka duh khawp mai. Sample test zawng zawng zingah 59.49% hi RT-PCR leh a tlukupui khawl chi hnih hmanga an test a ni a, Sample test ngai te a hun taka test theih nan theihtawp kan chhuah a, tunah hian District tinah hmun thenkhatah chuan TrueNAT test khawl, ‘minute PCR’ kan tih hi 2 te a awm a, thenkhatah chuan 4 te a awmna a awmin kan hria a ni.

Tin, kan *positivity rate* san chhan hi Pu Speaker, Mizoramah hian contact tracing hi kan ti tha em em a, kai tura rinhlelh hlir kan test a ni. Contact tracing atang hian ‘tute nge kai tur rinhlelh awm’ tih kha kan en tak zet a, rinhlelh hlir test a nih avangin kan sang lo thei lo a ni. State dangah chuan *mass-testing* an tih pawhin rail station te vaccine lakna hmunah an pawngpaw test tawp mai a, positivity rate hi a sang ve thei tlat lo a ni; hei hi kan hriat ka duh khawp mai. Tin, contact tracing kan tih that em em hian hna min thawh awlsam tir em em mai a, State dangah chuan contact tracing an ti ve tawh mang bar lo a ni; an tihna ala awm a nih pawhin keini ang tluka chipchiar leh uluk hi chuan an ti lo hrim hrim tih hi ka tarlang duh a ni. Keini chuan mass testing kan tih pawhin, *serial testing*, positive chhung leh khat leh khainnawihte kan han ti tha leh a, a hautak hle a, saptawngin, ‘vulnerable group’ kan ti a, target bik neiin fimkhur leh awmzenei takin kan kalpui a, churang chuan hei hi a hlawhtling a ni.

Entirna ka han sawi lawk ang a. Tlem lai deuh khan kan hre vek a, TNT, kan Hon. Chief Minister bialah sawn positive nikhat thil thuah, hei, Dr. ZR Thiamsanga, kan MOT Chairman te an va kal a chawlhni a ni nghe nghe a; an han test chu an lo tam khawp mai a, 600 chuang an niin ka hria khami ni khan, a rapthlak ang reng khawp mai a. A hnu thlakhatah sawlai bawrah sawn ka va kal a, chawlhni zan kha a ni a, an zai mup mup mai a, an lam thawm kha hriat a nuam khawp mai a, inkai tur chuang awm lo khan an control vek mai a ni. Chu vang chuan hei hi mass testing a thatna lai tak a ni. Mass testing hi sawrkar hmalakna in ni 35 chhungin khua leh veng hrang hrang 78 (Aizawl khaw pawn 22 telin) kan nei tawh a, heta tang hian kan dinhmun pawh eng emaw chen chu ziaawm lam a pan ve na lai kha a awm a ni.

Tin, chu bakah mass-testing bik chauha sample lak tawh hi mi1,06,714 test a ni tawh a, positive 3,229 hmuh a ni a, positivity rate hi 3.02% mass testing bikah a ni. District hrang hrang pawh a tul angin test hi kan nei mek bawk a, tin, mass testing hi mipui himna tur atan liau liau leh “thahnemngaihna avanga tih a ni” tih hi ka sawi duh a. Chuvang chuan medical team ten uluk takin an ngaituah thin a, inrawnna zau tak neiin, kei a hrelo ber hi chuan tihngaihna pawh ka hre chuang lova, amaherawhchu kan medical team ten uluk takin kan MOT Chairman, Dr.Thiamsanga hovin ngaituahna an seng nasa em em a, tin kan thawhpui pawl dangte pawh rawnin tiang chuan kan ti thin a ni.

Covid-19 vanga nunna chante thinsung takin vawiin niah hian kan tawrhpuia, medical team ten an theihtawp an chhuah tak meuh a ni tih pawh kan hriat ka duh khawp mai a Pu Speaker. Nunna chan an awm hian a bikin ZMC saw chan tamna a ni a, an rilru hi ana em em thin mai a, hei hi kan hriat pui pawh a tul khawp mai. ZMC bika nunna chan kan neihte hi zirchian mek an ni a, kan zo thawkhat tawh a, *co-morbidity* nei an tam hle a, ‘co-morbidity’ tih chu natna benvawn, khatiang thih pui tham ang chi kha a ni awm e, chu chu kan doctor thiam bikte sawi danin, a bikin zuk leh hmuam insum lo, cancer, kal, thin, chuap thalo, zunthlum leh thisen sang nei bakah HIV positive te, thau lutuk te, nunna chante zingah hian an tam lehzual a ni. Nunna chan te zinga mi 22 te hi Pu Speaker full-vaccine la tawh te an ni a, mahse nunna kan chan tho a ni. Amaherawhchu hei hi chhinchhiah ila, nimin kan update-ah chuan mi 128, 70 % te hi vaccine la miahlo te an ni a, heng vaccine la tawh nunna chan te hi a chungka ka sawi tak natna benvawn neite vek an ni.

Hei hi kan prove a, thil awmzia enchianna kan (audit) atang chuan, an natna serious tak mai, covid-19 hri kai lo mahse ngaituah awm tak tak te a ni. Vaccine lak hi a him thawkhat hle a ni tih erawh chu kan experience atang hian ‘a dik a ni’ tih erawh chu kan hriat nawn fo ka duh khawp mai. Natna hrik virus thar kan hmachhawn a, nat dan chi hrang hrang leh inthlak hlauhawm zual zel ‘mutation’ te an ti a, *mutate* te a nih avang hian enkawl dan pawh hi a buaithlak em em tawh mai a, tumah expert a awm tak tak theihloh a ni ber mai a. Taksain covid virus alo do let leh a hmachhawnna tur atana alo response dan hi a inan vek loh avangin enkawl na inang dawng rau rau zingah hian, a tam zawkin hospital an chhuahsan lain mi tlem zawk erawh chuan natna tuar chhuak zo lovin min boral san a, co-morbidity neilo, hrisel tha insawiselna nei miah lo thite pawh kan nei ve bawk a, a pawl tak zet a ni. Amaherawhchu damlo enkawl na kawngah ‘kan ti tha’ tih erawh hi chu ka sawi chak hrim hrim a, vawiinah hian sawrkar hmalakna leh kan medical team te, a bikin an inpekna vangin hei hi a sawi ngam ve hian ka hre

tlat a. ZMC-ah hian damdawi chi hrang hrang State dangin an neihloh ang chi, hmun dangah pawh an hman loh damdawi tha kan nei ve tlat mai a ni.

Tin, ‘treatment protocol’ kan ti mai a, treatment chungchangah pawh uluk takin doctor hovin an duang a, an uluk thei khawp mai a, meeting vawi tam tak an nei a, ka ho pawhin kar tin deuh thaw physician lam thiam bik te nen sawihona te kan nei thin a. Kan doctor te hi an tha ve khawp mai a, internet leh online platform dang hmangin khawvel hmun danga an thil hmuh leh an zir chhuah tharte an lo update ve reng thin bawk a, chu chu kan hmang tangkai hle a ni. January Ni 16 (kumin) atang khan Mizoram-ah covid-19 vaccine hi pek tan a ni a, September Ni 8 (nimin) thleng khan kum 18 chunglam mi la tura kan kan target hi 7,75,106 a nih laiin, 6,61,166 vaccine pek tawh an ni a, kan che tha ve khawp mai a. Chumi awmzia chu kan target kan achieve tawha kha 85% a ni. Tin, dose hnihna lak hun hi a *gap* an tih thui avangin 1st dose leh 2nd dose inkara kha tunah hian kan han speed tha ve leh deuh a, mi 2,75,996, 40% in full dose vawiin niah hian kan la thei ta a ni; a lawmawm kan ti khawp mai.

Tichuan August Ni 25, 2021 (thla kal ta) mai khan India ram pum huap hianin review meeting nei a ni a, chutah chuan first dose bikah Mizoram hi 8-na India ram State leh UT-ah kan tling a ni. Tin, 2nd dose la tawhah India ram rampum parukna kan tling a ni. Hei hi har ve deuh a ni. Tun dinhmuna kan mutan deuh ber hi chu Pu Ngunlianchunga bial, Lawngtlai District leh Mamit District hi a ni a. Lawngtlai District-ah hian 1st dose la 51% leh 2nd dose 32% an awm a. Mamit District, Pu Zira leh Pu Rintluanga bial pawh a ni vek tho mai a, Mamit District tihin ka han sawi ang a; Mamit District-ah 1st dose 65% leh 2nd dose la 34% an la awm a ni. Chuvang chuan, fur lai hian tlemin kal pawh a har deuh hlek a, ke a kal ngai te a la nih avangin. Thal/favang a ni chho ang a, he district pahnihah hian beihpui kan thlak ang a, kawng a awm thei tura beisei a ni tih kha ka tarlang duh a.

Tin, vaccine chungchangah hian kan Chief Secretary hi a fakawm thlawtin ka hria a, a chhan chu tuna kan Union Minister for Health hi a batch-mate kha a lo ni a, kan hnianghnar ang reng khawp mai a, (he House-ah hian sawi ta mai ila). Tunah pawh hian stock hi nuai 8 bawr vel kan neiin ka hre tlat; kan thlaphang lo khawp mai tih hi ka sawi duh a, a lawmawm takzet a ni. State dangah chuan an inchuh luh luh lai khan keini chuan engmah harsatna kan tawk lo a ni.

Pu Speaker, chhan hrang hrang avangin vaccine la duh lo an la awm nual mai a, Mizoram-ah pawh hian. Health Department-ah hian ‘Immunization Section’ kan nei a, nasa taka hma lain an duh loh chhan te leh an hnam ziarang te an zir a. Hnam hian ziarang hi kan lo nei ve deuh bawk a, Mizoram-ah pawh hian. Hengah hian kan han inzir Chiang zel a, vaccine rinhlelhna tibo turin hmanraw hrang hrangte pawh kan hmang ve a ni tih kha ka sawiduh a ni.

Tin, thla hmasa lam khan kan vaccine pek hi *containment zone* te a tam avangin kan muang deuh hlek a, kar hmasa leh tun kar chhoa vaccine kan pek zat khaikhinin tunkara kan pek hi a sang ta dawrh a ni. Second dose kha an rawn qualified a, 94% in a pung ta dawrh mai a. Chumi awmzia chu “94% change in weekly vaccination” tiin kan dah a, hei hi a lawmawm khawp mai. Hetiang renga kan kal chuan kan target, vaccine first dose pek hmasak te hi October chawhnu lam hi chuan kan pe tam thei hlein ka

ring a. Amaherawhchu, vaccine lak hi mahni duhthlanna a nih avangin kan target 100% kan pe thei ang em tih erawh hi chu sawi theih a ni chiah lo a ni.

Tin, covid-19 vaccine pekna kawngah hian min puitu tam takte chungah hian lawmthu sawi sen loh a awm a. 100% target pe thei tur hian vawiinah House Member zahawm tak takte pawh “kan bial theuhah tan la teh ang u” tih ka chah duh che u a ni. Nunphung pangngaia thlamuang taka kan awm leh theih nan vaccine hi a pawimawh em em a ni tih hi ka tarlang duh a. Third wave lo thleng tur nia sawi atana inpuahchahna atan pawh hian a pawimawh thlawt a ni. Kan vaia kan lak vek chuan kan tuar nep ang tih hi a chiang a ni.

Hmanniah North East Health Ministers’ meeting Guwahati-ah ka zuk tel a, Govt. of India official-te chuan “Mizoram chu first wave-ah in che tha bawk a, in experience lo tluk a ni” min lo ti a. “Tuna kan dinhmun hi engnge” ka ti a, “second wave hi in zawm tawh a ni lo maw” an ti mai mai a. Hmanniah Delhi kan zu kal khan ICMR-a hotupa ber Professor Balram a nen kan inkawm a, ani pawh chuan a lo ti ve tho a. Eng pawh ni sela, third wave hi hmachhawn thei kan ni tih hi hriat a pawimawh a. Mithiamte sawi danin naupangin an tuar nasa deuh dawn niin a lang a, hei hi a dik tan te pawh hian kan hria a. Second wave-ah pawh hian naupang hri kai thla tin mai hian an pung ta a ni, Pu Speaker, hei vang hian naupangte enkawlina tur lam hawi pawhin tunah hian hma lak zel a ni ta a. Tin, ZMC ah hian ‘NICU’ kan ti mai a, ICU kan tih ang hi a ni ang chu, khum 10 awmna kan peihfel thawkhat tawh a, hei hi khum 25 thlenga tihbelh theih tura ruahman a ni dawn a. Tin, ventilator leh oxygen support-na tur pawh ruahman a ni a. Heng bakah hian PICU Ward hi khum 10 awmna peihfel tep a ni tawh bawk a ni.

Tin, heng bakah hian ZMC doctor leh nurse-te pawh Paediatric Care pe thei tura training pek tum mek a ni a, district tin atangin an district mite training pe chhawng thei tura ruahmanna kan nei a. Tin, district thenkhatah hian naupang pual deuh hlek bika ‘ICU’ kan tih ang pawh nei turin hma pawh kan la mek a ni. ‘DCHC’ kan ti a, District Covid Centre bik hi 13 hawng turin tunah hian ruahmanna kan nei mek a ni.

Hripui do hi a hautak hle mai a, kan hre vek a. Mi pakhatin duh duha thutlukna siam hi a theihloh hrim hrim a. A hmingin kei pawh Health Minister, a mawhphurtu ka ni na a, a hrelo ber hi ka nih ka ring a. Kan Hon. Chief Minister nen pawh hian kan inbe zing a, “keini pahnih te hi chu *non-medical* mi kan ni a kan hrelo teh mai a nia” kan ti thin a, a hriatloh tak tak theih a ni. Chutiang karah chuan kan thiamna leh theihna te hi a tlem hle a, thil hriatloh tam tak pawh hi kan nei ang tih hi ka ring a. Khangah khan tihfuh loh chang a tam ang a, in hriathiamna vawiinah hian ka ngen nghal a.

Hmalakna reng reng hi rampum nghawng thei thil a nih avangin ‘collective decision’ an ti mai a, a *huhua thutlukna* siam a ni thin a. Kan Chief Minister zahawm tak hian thahnem min ngaihpuin a vei em em mai a, a thlazar hnuaiah hian theih tawp chhuahin hma min lak pui thin a ni. Thutlukna siam a nih dawn reng rengin mipui aiawh pawl hrang hrang Joint NGO, VLTF, LTF aiawhte bakah medical expert pawl hrang hrangte, sawrkar official pawimawh tak tak te leh kan Chief Secretary hovin uluk taka ngaihtuah ho thin a ni a. Kan MOT Chairman, Dr. Thiamsanga hovin uluk takin ngaihtuahna an seng ho thin bawk a ni.

Heng bakah hian Health Department hnuaiiah kawng hrang hranga hma la tur team sawmhnih vel kan din a, Anni hian ground-work khawihin chhum lo chat loin an thawk a ni. Chutiang bawkin Hon. Chief Minister hoin ‘All Party Meeting’ hi kan nei tawh a, keimah tel pawh hian AMC area bikah kan MLA zawng zawngte in lo kal kim deuh vek a, meeting kha vawikhat kan nei nghe nghe a, in ti tha hle a ni. Tin, AMC Councillor zawng zawngte, kan Mayor tiamin inrawnkhawmna hi tum hnih kan nei tawh a.

Tin, kan thawhhona tha hi ka ngaihluin ka sawi bang thei lo a ni. First wave-ah khan kan mangang ru hle mai a, mak tak maiin case kan ngah ta lutuk lo a, inenkawl sen loh kha a awm ta lova. India ram leh khawvel hmundanga inenkawl na chang lo manganga thi ruih ruih kan hriatlaia kan han tawng ve lo te, kan inenkawl na tha viau lo mah se inenkawl theia kan awm thei kha a ropui a.

Tin, *Triple-C* atana sawrkar hmunhna min lo ngaihtuah sak tute chungah lawmthu kan sawi bakah tunah hian 4C hian min chhan em em mai a. Kan hre vek a, kohhran leh khawtlang, VLTF, LTF te theihtawpin an pen chhuak a, ei tur, damdawi leh an vengchhung bikah medical team awm ang ang te nen an thawk hote hi a mawi em em a, an hah hle tawh ang tih pawh ka ring a.

Tin, hripui laka kan himna turin khawvel ina pawm “Covid Appropriate Behaviour” kan tih mai mask vuah that te, kut silfai uluk te, midang hlata awm te hi tun thlengin a pawimawh a ni tih hi kan hriat ka duh khawp mai a. A bik takin mask vuah that pawimawh zia hi keini ngei pawhin kan finfiah a ni.

Tin, MOT zirchianna ka han sawi lawk ang a. Primary contact mi sanghnih interview-naah hian, mask vuah tha an ni bawk a, hri kai pakhatmah an awm lova. Tin, Aizawl Civil Hospital-ah tlem lai deuh khan naupang, a nu damlo awmpuitu a awm a, a nu a positive tih hriatchhuah a ni, a nu a vil reng a, a riahpui bawk a. Mahse mask tha takin a vuah a, a nu bulah a mut pawhin mask kha a phelh lova. Tin, thil a ei pawhin a mask kha keuin a ei mai a, chuvang chuan a positive ve miah lo a ni. Kan Deputy Chief Minister pawh hi an chhungkua hian sawi an neih kha; a theih tlat a ni.

Tichuan, contact tracing team chi thum kan neih - Police, Health leh LTF te contact tracing result atanga kan hmuh chhuah chu chhungkua, thenawm intlawh pawh nasa lutuk te, thian inkawmho kan uar lutuk hi kan inkaichhawn na tam ber a ni. Mizo chu a buaithlak khawp mai a, covid leh Mizo culture, kan nunphung hi a inmil lo em em hi a buaithlak khawp mai a, kan nunphung kan her rem hret hret hi a tul ta takzet a. Sawrkar chuan theihtawp a chhuah zel dawn a, Zoram mipui him nan mipuite pawhin kan tih ve tur a awm tih hre nawnin, he *covid behaviour* hi hripui len chhung hi chuan zawm hram hram turin kan inngen a, Lockdown puan pawhin kan fimkhur loh chuan awmzia a nei lo a ni. Chuvang chuan mahni leh kan chhungkua kan zavaiin in *self-lockdown* ila, kan thenawm khawvengte nen in self-lockdown thei hram hram ila. Hetia kan tan chuan rei kan tih a ngai loving, Pathian khawngaihna a zarah.

Hripui do hi thiam a har em em a ni tih hi ka sawi nawn leh duh a, zep rual a ni lova. Sawrkar ang pawhin kum khat awrh, 2018-ah sawrkarna kan siam a, 2019 kan han hmang a, kumkhat emaw kan han sawrkar a, covid-in min rawn chenchilh ta thut mai a. Health Department ngat phei chu tlang deuha ka sawi duh chu, kan han sawrkar

chiah khan post chi hrang hrang doctor leh a dang ruak kha sanghnih chuang kan nei a ni. Chutah chuan kan Hon. Chief Minister hian theih tawp min chhuah pui a, 2019-ah khan post hi sangkhat dawn lai lak min phal sak a. Mahse covid in min han nuai ta a, han lak ngaihna a awm ngang lo a, a harsa ta khawp mai a. Chutih lai chuan engtin emaw ZMC bik-ah chuan a nghet lo leh voluntee tein kan han kal a ni a. Chuvang chuan hospital tha kan la din hman lova, kum khat chauh kan la sawrkar a, a buaithlak ve lutuk a, thawktu tur lak hman a ni bawk si lova, min barakhaih takzet a ni.

Ram changkang leh changtlung zawk, health and infrastructure, hospital leh khawl tha neite, mamawh eng pawh awm sela lei zung zung theite pawh hi an tlawm a ni covid lakah chuan. Mangang a an tlawm rawk rawk laiin keini erawh chu Pathian venhimna kan dawng a, hmun danga dinhmun rapthlak tak an tawn thin ang kha Mizoram-ah chuan chuti takin a thleng lo te hi kan vannei thlawt a ni.

Hetih lai hian ka sawi fo thin, covid-19 ral rel hi a harsa em em a. Vawiina tha tak nia kan hriatte hi naktukah emaw a karlehah emaw chuan a lo tha lova, chuvang chuan inrin dan thiam pawh hi thil har tak a ni. Chuvang chuan, duhtusam lo thil tam tak, mimal tak pawha ka dai sual, ka team te pawhin an dai sual te pawh a awmin ka ring a, chungah chuan in mi hriatthiamna leh in mi ngaihthiamna hi thinlung takin he House kaltlang hian ka ngen ngawih ngawih che u a ni.

Mipuite inzirtirna kawngah nasa taka tan kan lak lehzuah hi a ngai dawn a, theih tawp kan chhuah ve in ka hria a. Talk show ringawt pawh I&PR Minister hi a fakawm khawp mai a, wawi 23 lai mai min buatsaih sak a. Thuchah pawh wawi tam tak kan hotute hian TV kaltlangin an sawi a ni. Chuvang chuan covid-19 dona kawnga media te, print media leh electronic media ten theihtawpin min tawiawmnaah hian lawmthu kan sawi lo thei lova. I&PR ngat phei chu mu hman lovin waviin thlenga min buaipuitu te an ni.

Pu Speaker, a tawp berah chuan Pathian kutah kan tlukluh reng hi a ngai tak zet a ni. “Hri thalo lakah a chhanhim dawn che a ni” tih leh “Ani chu kan inhumhimna leh kan kulhpui a ni” tih kan hriat fo ang khan, he hripui, khawvel ram ropui tak takte pawhin an hneh loh do hneh tur hian engkim ti thei kan Pathian hnenah Zoram chhunga mipui zawng zawngte, Zoram pawna kan u leh nau awm zawng zawngte, tawngtai mi te, kohhran pawl hrang hrang te thinlung leh tih tak zet in thahnem ngai taka, nasa lehzuah a tawngtai leh sauh sauh turin ka sawmin ka ngen tak meuh meuh che u a ni. Ka lawm e.

SPEAKER : Awle, kan Dan 60-na hian a lo ziaak a, hei hi sawiho ngai lo a ni a. *One day advance* in min rawn pe a, a thui ka ti deuh hlek a, keipawhin. Amaherawhchu, a khawi lai hi nge pah tur ka hre silo a, a pawimawh vek mai si a. Han pah dawn ila a karah inzirtirna tha deuh deuh kha a awm bawk si a, ka pah ngam ta bik lova. Member ten dawhthei taka in ngaihthlak avangin a lawmawm ka ti a ni; *hripui* a ni miau si a.

Awle, tunah chuan *Laying of Paper* ah kan kal ang a. Minister zahawm tak Pu Robert Romawia Royte, “Correction of answers to Starred Question. No. 219 of Eighth Session of Eighth Legislative Assembly” tih chu House dawhkan ah rawn *lay* turin ka sawm e.

PU ROBERT ROMAWIA ROYTE, MINISTER: Pu Speaker, i phalna leh he House remtih'nain, "Correction of answers to Starred Question. No. 219 of Eighth Session of Eighth Legislative Assembly" chu he House dawhkanah hian ka pharh e.

SPEAKER : A copy kha han sem ula. In chang kim em?

Presentation of Report-ah kan kal ang a. Er. H. Lalzirliana, Chairman, Committee on Government Assurances "Sixth Report of Committee on Government Assurances, (2020-2021)" hi House ah rawn *present* turin i lo sawm ang.

ER. H. LALZIRLIANA : Pu Speaker, i phalna leh he House zahawm tak remtih'nain, "Sixth Report of Committee on Government Assurance relating to Government assurance given by Ministers in the Third and Fourth Session of the Eighth Legislative Assembly of Mizoram" hi ka rawn present e.

Pu Speaker, tlem han sawibelh duh ka nei a. Assurance committee hi a lo pawimawh em em mai a, he committee hian member zahawm tak tak ten House-a kan zawhnate leh kan ngennate Minister-in a *assure* kha kan pick a, chutah chuan section pathum-in kan then ta a ni. Uluk takin Session paper-a kan han zawhnate leh tawngkaa zawhbelhna kan zawh ang chi te pawh kha Minister-in a chhanna a zir khan 'hei chu a assure a nih hi a' han tih ang tur chi kha kan han lakhawm ta vek a. Chutah chuan kan review-na pakhatnaah chuan he department-in a rawn chhanna hi "a lungawithlak e" kan ti a, *accepted* angin kan pawm ta a.

A pahnihnaah chuan, department ten an rawn chhanna hi la bawhzui tur a nihin 'Further Recommendation' turin department-ah forward leh a ni ta a. Tin, a pathumnaah chuan department-in a rawn chhanna te bawhzui ngai tawh lo a nihin 'Not to Pursue' tiin a awm ta a ni.

Hei hi a lo pawimawh khawp mai a, MLA ho tan phei chuan a lo pawimawh em em zia kha kan hmu a, a lawmawm khawp a. Tunah pawh report kan rawn pek kha chiang taka en chuan, member-ten an lo tih kha min lo assure tawh, min lo tihhlawhtlin sak tawh a ni. Department active leh active lo, an performance tha leh tha lote kha kan lo hmu thei a ni. Chuvangin chu chu ka han sawifiah lawk a ni e.

Pu Speaker, heng chi hrang hrang kan rawn siam te hi House-ah hian kan rawn present a ni. Ka lawm e.

SPEAKER : A copy kha han sem ula. Kan chang kim em?

Awle, kan chankim chuan, a dawt leh, *Election to Financial Committees*-ah kan kal ang a. Kan hriat angin Financial Committee hi kan House hian pali (4) a nei a, chungte chu -

- 1) Public Accounts Committee;
- 2) Committee on Estimates;
- 3) Committee on Public Undertakings;
- 4) Committee on Local Funds Account te an ni.

Hei hi *thla 30 term* tur a ni tih kan hriat tlan kha; Nomination hi dan ang thlapa file tur a ni.

Tin, Vawiin Session-ah hian business a tam lo in ti maithei a. Hemi inthlan hrim hrim hi business lian tak a ni a, Session laia thlan tur anih avangin; a hranpaa Session koh ngai lovin business pangngaiah kan kal chho ta a, chu chu vawiin kan business zinga pawimawh tak a ni reng a ni. Tichuan, kan sawi angin nimirah nomination kan han siam a, inhnudawh hun kha nimin dar khat thleng kha a ni a, tichuan, election neih hun hi vawiin, Ni 9.9.2021(Ningani) hi ruat a ni.

Tichuan, Member zahawm takte, inthlan tur anih rualin tih dan phung pangngai kan lo nei a, member te, group tin te, a tawngkam mawi lo lam ni lovin party hrang hrang ten *proportional representation* kan rawn siam ta a, chu chu tuna in rawn siam ang hi tha kan ti mai em? A principle-in ka han chhiar chhuak ang a, chu mia tana nomination in rawn siam te chu –

Public Accounts Committee Member tura tan, Member zahawm tak takte -

1. Pu Zodintluanga Ralte, INC;
2. Pu Vanlalhlana, Independent;
3. Pu Ramthanmawia, MNF;
4. Dr. ZR Thiamsanga, MNF;
5. Pu Lalrinsanga Ralte, MNF;
6. Dr. Vanlalhlana, Independent;
7. Pu Zothantluanga, MNF te an ni a.

Tin, Committee on Estimates-ah hian Member zahawm tak takte –

1. Pu C. Ngunlianchung, INC;
2. Pu Lalduhoma, ZPM;
3. Pu Lawmawma Tochwawng, MNF;
4. Pu Ramthanmawia, MNF;
5. Pu Lalchhuanthanga, Independent;
6. Dr. F. Lalnunmawia, MNF;
7. Pu L Thangmawia, MNF te an ni a.

Tin, Committee on Public Undertakings-ah hian Member zahawm tak tak te –

1. Pu KT Rokhaw, INC;
2. Pu Lalrintluanga Sailo, MNF;
3. Pu Lalchhuanthanga, Independent;
4. Pu VL Zaithanzama, Independent;
5. Pu H. Biakzaua, MNF;
6. Dr. K. Pachhunga, MNF;
7. Er. H. Lalziriana, MNF te an ni a.

Tin, Committee on Local Fund Accounts-a Member turin kan Member zahawm tak tak te –

1. Pu Nihar Kanti Chakma, INC;

2. Pu Lalduhoma, ZPM;
3. Pu C. Lalsawivunga, Independent;
4. Pu C. Lalmuanpuia, MNF;
5. Dr. F. Lalnunmawia, MNF;
6. Dr. Vanlaltanpuia, MNF;
7. Pu Lalrinsanga Ralte, MNF te an ni.

Tichuan, tunah hian heta in rawn rawt ang hian, a mal mala inthlang lo khan tuna mi ang hian House hian kan pawm thei mai em, Member-te ka zawt a che u. (MEMBER-TE: Pawm thei e.)

Awle, a lawmawm e. Hei hi tih dan thin pangngai a ni ve hrim hrim a. Tichuan, heng Committee Member hrang hrangte atang hian Chairman tur chu an la rawn ruat leh dawn a ni.

Awle, vawiina kan business chu kan lo zo leh ta a...

PU LALDUHOMA : Pu Speaker, kan hriat angin hun eng emaw ti chhung helai kan rorelna sang berah hian thu thei loin ka awm a. Khami chungchangah khan tu chungah mah lungawilohna emaw, rilru chhia emaw ka nei miah lo a ni tih hi thinlung takin ka sawi duh a. Tin, he hmuna ding leh thei tura min siamtu Pathian leh Serchhip bial mipuite leh hmun hrang hranga min duhsaka min tawngtaisaktute chungah lawmthu ka sawi a. Brig. T. Sailo-an, “*Ngaidam la, theihngihl rawh*” a tih kha hre rengin vawiinah hian in ngaidam tawn ila, theihngihl tawh ila, hma lam thlir tlangin kan ram tan theih tawpa rorel ho turin ka sawm che u a, lawmthu ka sawi a ni e. Ka lawm e.

SPEAKER : A lawmawm e. Kan report tlangpui ka lo pe ve leh ang a.

Tun tum Session hi 8th Legislative Assembly, (Session vawi 8-na) a ni a, BAC Ni 24.08.2021 (Thawhlejni) a thukhawmin a rel angin, vawiin hi ni hnuhnung ber a lo ni ta a. Ni 3 chhung aw h tura tih kha ni 3 chhung chu kan lo zo leh ta a.

Tichuan, kan Session chhunga kan hnathawh, kan thil tih tlangpuite chu-

A hmasa berin *Obituary* kan nei a, Member zahawm tak tak lo ni tawh leh Minister lo ni tawh Pu PC Zoram Sangliana leh Pu Andrew H. Thangliana-te an ni a. Pu Zoramthanga, kan House Leader Chief Minister zahawm takin an chanchin tawi te sawina hun leh sunna hun a nei a ni. Chumi zawhah chuan Member zahawm tak takte, Pu Zodintluanga Ralte, Pu Vanlalhlana, Pu KT Rokhaw, Pu Lalruatkima, Minister leh Dr. ZR. Thiamsanga ten an ui thu leh an sunna thu an sawi a. Hemi zawh hian ngawi rengin minute khat dingin hun kan hmang a ni.

Tun Session-ah hian House-ah Report 5 present a ni a, chungte chu -

- i) Seventh Report on Business Advisory Committee;
- ii) Second Report on Action Taken by the Government Against the Recommendation contained in the First Report of Subject Committee V;

- iii) Fourth Report on Action Taken by the Government on the Recommendation contained in the Third Report of Committee on Paper Layed on the Table;
- iv) Fifth Report on Committee on Paper Layed on the Table;
- v) Sixth Report on Committee on Government Assurance, 2020-2021 te a ni.

Tin, Panel of Chairman-ah hian Member zahawm tak takte-

- 1) Pu Nihar Kanti Chakma
- 2) Pu Lawmawma Tochwawng
- 3) Pu H. Biakzaua
- 4) Dr. Vanlalhlana te an ni.

Zawhna & Chhanna, zawhna lut a vaiin Starred Question 258 a ni a, a vaiin kan admit a, admit loh a awm lova, withdraw a awm lo a,. *List of Business*-ah hian 60 kan dah thei a. House-a chhan zat hi tukina mi nen 9 a ni a, a tlem thei khawp mai. Helaiah hian ka sawi duh chu, zawhna hi a tam thei ang ber hi zawt ta ila, member-ten thahnem ngaiin ram tan in zawt a. Speaker-in in zawhbelhna ka han nawr deuh hlek che u hi tawngkam mawi lo ni lo se, a khawi emaw laiah a mikhual awrpuar zawng zawngin, ‘a lai lo’ tih velin an lo ti thin a, “A thlen in pa a rel zui” an tih ang te pawh hi ka tehkhin a. Chuvangin Zawhna pakua chauh chhan theihin kan chhawpchuak thei a ni.

House-a chhan hman loh hi tun Session zawhah hian kan rawn pe dawn che u a ni, a bak zawng kha. Tin, Unstarred Question Zawhna lut zat hi 207 a ni a, Zawhna admit zat 225, Zawhna reject zat 2 a awm a ni. Heng hi reject anihna chhan chu, a tam lutuk thin a, tam deuh maiin phok 2 deuh thaw te an rawn ti a; “a tam tur a ni lo, a thui tur a ni lo” tih ngawih ngawih a ni thin a, a chhangtute leh department tan pawh a buaithlak lutuk ang e kan ti a, chungte pawh chu a ni pah fawm a ni.

Starred Question, Unstarred Question-a leh zat hi 177 a ni. Kan sawi tawh ang khan zawhna dawn zawng zawng hi *Unstarred Question 207* leh *Starred Question 485* a tling a ni.

Laying of Papers hi 6 kan nei a, chungte chu-

- 1) Report of Comptroller and Auditor General of India on Finance and Accounts, 2019-2020 Vol-I, Vol-II.
- 2) Appropriation Accounts, 2019-2022 in respect of Govt. of Mizoram, Notifications issued under the Mizoram Goods & Services Tax Act, 2017 w.e.f 03/03/2021-09/07/2021.
- 3) The Mizoram Private Placement Agencies Regulation Rules, 2017.

4) Corrections of Answers regarding NHM (Covid-19 dona atan bungrua or equipment lei leh a hman zat) NEC, in connection with Unstarred Question No. 96 of Seventh Session of 8th Legislative Assembly.

5) The Mizoram Legislative Assembly Grants of loans and advances to Members (Fifth Amendment) Rules, 2020.

6) Correction of Answers to Starred Question No. 219 of 8th Session of 8th Legislative Assembly te an ni.

Tin, *Special Mention* hi Pu Zodintluanga, Member zahawm takin Assam ram nena kan inrina (border) ah Mizo khualzin miten harsatna an tawh chungchangah sawina hun a hman a ni. Kan Rules 139-na tlawhchhanin Motion 2, “*Discussion on matters of Public Interest by Motion*” Member zahawm tak Pu Lalduhoma hnen atangin kan dawng a. Motion-te hi Dan 139-na in a sawi, pawm theih a nihna tura condition hrang hrangte nen ngun taka exam-in hei hi kan admit ta lo a ni.

Session chung hian *Government Bill 2* a lut a, pass ve ve a ni. Chungte chu: -

- 1) The Mizoram Goods & Services Tax (Amendment) Bill, 2021.
- 2) The Mizoram Agricultural Land Leasing Bill, 2021.

“*Statement by Administrator*”, tuna kan ngaihthlak zawh ang chiah khan Dr. R. Lalthangliana, Minister zahawm takin Covid-19 chungchanga House-ah statement a pe a ni. *Election to the Financial Committee*-ah kan ngaihthlak tawh ang khan, Public Accounts Committee, Committee on Estimates leh Committee Public Undertakings, Committee on Local Fund Accounts member turte thlanna neih a ni a, kan rawn puan tak te kha House-in a pawm a ni.

Tin, a tawp nan, kan Session ni hnuhnung ber chu tuang takin kan lo thleng leh ta a, Session-a tih tur kan duan *List of Business*-a kan dahte tuang takin kan kal thei a. Session chung zawnga member zahawm zawng zawngte thahnemngai tak leh dawhthei taka ram leh hnam tana in tha leh zung, in rilru leh in ngaihtuahnate hmanga kan thawhona hi a lawmawm ka ti tak tak a. Hun tha tak leh hun duhawm tak kan nei thin te hi a lawmawm tak meuh meuh a ni.

Tin, seat arrangement hi ngaihdam dil kan duh leh thin a. Kan sawi tawh ang khan, a hnung lam seat pangngai lova kan PA system tha loin; amaherawhchu, buaina kan nei lo hlauh a, chutiang chuan kan han ti leh nawk nawk a. Covid dona kawnga kan hotute, state level-a Chairman CS-hoa Committee kan neih khan, “seat arrangement hi SoP ngaiin kal leh se” tiin kan rel a, a ngai lo chuan kan ngam bik lo e an ti a, tichuan angaiin kan kal a. Hnung lama thute kha inhriatthiamna kan han dil leh mawp mawp a ni.

He Session tuang taka kan kal theihna tur atana department hrang hranga thawktu zawng zawngte chungah lawmthu kan sawi a. Venhimna lama thawktu kan police department lam te. Tin, tun tumah hian a bik takin Health Department-te an rim

em em a, kawng hrang hrangin. Tin, Parliamentary Affairs Department leh kan Assembly Secretariat te an thawrimna avangin lawmthu ka sawi tak meuh meuh a ni.

Kan sawi tawh ang khan, vawiina kan Assembly, tunah bik hian duhthusam a kal thlap lo laite pawh kha Covid-in min tihbuai vang a ni a, a pawh kan ti tak meuh meuh a ni. Sawi tawh ang khan quarantine te an awm nual a, kan staff-te pawh rilru mangang nen hrehawm ti chung leh rim takin an thawk a, kan fak tak meuh meuh a ni. Kan vaia tan tlanna avangin lawmthu ka sawi tak meuh meuh a ni. Tunah chuan kan tih tur kan zo leh ta a, kan lo chawl tawh ang.

The House is adjourned sine die. (12:35 PM)